

فريدة

حين جف رحيقها .. أزهرت

عنوان الكتاب: فريـــــــــــــــــدة

حين جف رحيقها.. أزهرت

الموضوع: روايــــــــــــــــة

التأليف: هـــــــــدير نهـــــــــاد

إخراج فني: عـــــــــرو ســـــــــالم ســـــــــواج

تصميم الغلاف: باـــــــــســـــــــم هـــــــــدحت

رقم الإيداع: 2019/ 27213

الترقيم الدولي: 9-79 -6639 -977 -978

الناشر: دار تويــــــــــــــــة للنشر والتوزيع

www.facebook.com/Tweetforpublish

tweetpublishing2017@gmail.com

٧ش محمد أبوالعطا- محطة العريش- فيصل- الجيزة

رئيس مجلس الإدارة: م/ أحمد عبد العزيز

المدير العام: أ/ رشا العمري

 01017799799

01225762066


Tweeta

للنشر و التوزيع

#عَرْد_للعالم

جميع حقوق الطبع والنشر محفوظة

فريدة

حين جف رحيقها.. أزهرت

رواية

هدير نهاد

الإهداء

- إلى أبي وأمي أهدي لكما كتابي الأول، علشان أقول لكم شكرًا على كل حاجة عملتوها علشاني، ربنا يطول لي في عمركم ويجعلكم دايماً جنبي.
- إلى روان، توأم الروح وعكازي في الحياة، شكرًا على إنك بتكوني هنا دايماً، شكرًا علشان أنا من غيرك ما كنتش هعرف اكتشف نفسي، دمتي ضوء بينورني.

- إلى هبة، إلى أكثر حد مؤمن بيا في الحياة دي وأكثر حد بيقف جنبي، أنتِ أعظم بكتير من اللي ظاهر لك، دمتي لي حتى نشيب سويًا.
- إلى نوران مصدر الحب وأكثر واحدة ساعدتني في الكتاب ومشيت معايا خطوة بخطوة لحد ما وصل للنور، ممتنة ليكي بكل الحب اللي في الدنيا.
- إلى السوشيال ميديا اللي عرفتني على علاقة دائمة ل أكثر من ٥ سنين من غير ما نتقابل، فاطمة، أنت أحسن وأنضف حاجة ممكن تكون في حياتي

- إلى كل صحابي اللي سندوني ووقفوا جنبي ودعموني بكل اللي يقدرُوا عليه انتو المعنى الحقيقي للصدقة. بحبكم، دمتم خير صحبة.

مُقَدِّمَةٌ

"إلى من لم تسع المدن قلوبهم رغم وسعها، إلى من لم يكن لديهم من يسمعهم ويبقى بجانبهم، إلى من كان أهلهم جزءاً في تحطيم شيئاً بداخلهم، إلى العصي والمتمرد، إلى من يشعر بالذنب، إلى من تركه حبيبه في وسط الطريق، إلى العاشق وإلى الحزين، وإلى من لا يشعر بشيء".

(١)

جلست على حافة السرير، بعد أن تشاجرت مع والدتها على اللا شيء، نظرت إلى نفسها وبدأت ببث فكرة أنها بخير وأن كل ما يحدث سوف يمر، وحاولت أن تقتنع بأن الحياة ليست سوداء طيلة الوقت، ثم ضمت نفسها وبدأت في البكاء قائلة: "أنا ليه كل ما بقربلهم بيبعدوا، ليه دايمًا ببقى الطرف اللي ببذل جهد ف كل حاجة، ليه دايمًا ببقى بالنسبة ليهم زيادة عدد؟ ليه ليه بهم بأصغر تفاصيلهم وهما حتى مبيلاحظوش أكبر تفاصيلي، ليه دايمًا بيتعاملوا كأني مش مهمة، ليه أنا دايمًا مش مهمة؟ ليه دايمًا بستحمل وأنا محدش بيستحملني؟ ليه دايمًا بفضل للأخر ومحدش فهم فكر إنه يمشي معايا خطوة..

كان بداخلها شعور أنها تُريد أن تستمع إلى اجابة، ظلت تبكي على أمل أن يأتي أحد ويفسر لها لِمَ يحدث معها كُل هذا ولكنها كانت تتحدث إلى نفسها ككل مرة، ف قررت أن تهرب من هذا العالم الوحشي وتذهب إلى النوم..

في صباح اليوم التالي دخلت والدتها كي تخبرها أن أصدقائها بالخارج ويطلبون مقابلتها، ف خرجت إليهم وما أن رأتهم حتى أرتمت بأحضانهم وظلت تبكي، حتى إنها تناست تمامًا ما كانت تتوقع من أجله ليلة أمس، طلبوا منها أن تسامحهم على ما كانوا يفعلون بها وظلوا يرددون لها الكثير من عبارات الأسف ف ابتسمت لهم ثم تفوهت إحداهن قائلة:

ياللا نبدأ من جديد ونكون كلنا واحد قوموا نخرج ونسى كل اللي فات.
وافقن جميعهن على الفور حتى هي.

(٢)

طرقت الأم باب الغرفة ولم تتلقى أي جواب، كساها القلق ف دخلت على الفور لتجد ابنتها فاقدة للوعي حاولت إفاقتها أكثر من مرة لكن لا جدوى، ذهبت بها إلى المستشفى التي بجانب المنزل، لتتفاجأ أن ابنتها في غيبوبة ولم يعلم الطبيب أي سبب لدخولها في تلك الحالة، ف نظرت له ويعلو على وجهها علامات القلق

يعني إيه يا دكتور!!

- يعني بنت حضرتك في غيبوبة ومش عارفين إيه السبب هنخلمها على الأجهزة ولما تفوق هنعملها شوية فحوصات يمكن نوصل لحل.

بعدها ذهبت مع أصدقائها لم تكن تتوقع أن تشعر بمثل هذه الفرحة من قبل شعرت وكأنها تجلس بينهن من جديد، كان بداخلها صوتٍ يردد لها أنهن حقًا قد تغيروا، ذهبوا الأماكن عديدة والتقطوا بعض الصور التذكارية وفي نهاية اليوم عادت إلى منزلها ثم ذهبت إلى غرفة والدتها مسرعة.

الله الله من زمان مشفناش الضحكة دي يا قمر.

-حاسه أني طابرة يأمي، حسا أن كل حاجة كان نفسي أحققها وأحس بيها حصلت انهاردة، ده حتى يوسف كلمني انهاردة وفهمني كل اللي حصل وطلعت أنا اللي فهمت غلط ومكانش هيبعد عني أنا بس اللي اتسرعت، عارفة؟ زي ما يكونوا كانوا بيكسروني طول الفترة اللي فاتت دي وصلحوني انهاردة بطريقة أنا مكنتش اتخيلها.

ربنا يبعد عنك العين يا حبيبتى، بس على فكرة أنا بحبك أكثر منهم
برضه..

-هو أنا حد يقدر يحبني زيك يا ست الكل؟ تصبحيلى على خير.
غدت في نوم عميق لم تكن تتخيل أن تشعر ب ارتياح هكذا من ذي قبل،
في صباح اليوم التالي شعرت ب آلام تسير في جسدها وشعرت بثقل جسدها
فتحت عينها ووجدت نفسها بداخل غرفة بيضاء وفي يدها أشياء غريبة
ووالدها تجلس في ركن بعيد وفي يدها المصحف وتبكي حاولت القيام ولكن لم
تستطع قامت والدتها على الفور وطلبت الطبيب:

_حمدلله على سلامتك احنا كنا خايفين تطولي معانا شوية.

' نظرت له بتساؤل مندهشة'

-أنا فين أنا فين يا ماما؟؟!

_أهدي يا فريدة أنتي من ساعت ما رجعتي البيت تعبانة وأنا صحيت
الصبح لقيتك مغبي عليكي ومن وقتها وأنت محجوزة ف المستشفى.
-ازاي يا أمي؟ أنا اول امبارح كنت تعبانة وبعدين امبارح كنت مع صحابي
ويوسف ومكنتش زعلانة ولا حاجة.

ضممتني إليها وهي تبكي وتقول:

_يا حبيبتى اللي بتقوليه ده عدى عليه اسبوعين ومن وقتها وأنت هنا
ومكنتش فيه صحابك ولا يوسف ولا حد.

-يعني ايه؟ يعني ده كله وهم؟ كان حلم! كان ف خيالي وبس؟ يعني يوسف
لسا بعيد؟ يعني هما طلعا بيلعبوا بيا فعلا؟ يعني مفيش حاجة اتصلحت؟

'قالت تلك الكلمات ثم دخلت في حالة انهيار، حزنت والدتها على حال ابنتها ثم ازداد الحزن عندما تذكرت إنه لا يوجد أحد سأل عليها طوال مدة مرضها'.

بعد اجراء الفحوصات اللازمة لم يعثروا على سبب لمرض فريدة ف طلب الطبيب من والدتها أن تعرضها على أحد الأطباء النفسيين لعل شيء ما تعرضت له تسبب في هذه الازمة ثم رشح لها صديقه الدكتور نادر وقال أنه من أكفأ الأطباء، وبعد يومين كتب لها على الخروج من المستشفى.

عدت إلى المنزل، مر أسبوعين على خروجي من المستشفى ولم يتحسن شيء، باتت أمني تقنعي بفكرة الطبيب النفسي ولكني كنت أرفض بشدة، هي لم تتفهم أن ما بي ليس بمرض، لا أحد يشعر بما أشعر به مهما تحدثت عنه، لذلك فضلت الجلوس في غرفتي بعيدًا عن الضوضاء، امتنعت عن الطعام والشراب كما أنني اصبحت نادرة التحدث حتى مع والدتي، كنت أكتبُ فقط أخذت قلبي صديق، ف أنا لست بحاجة للعالم، لا أنكر أن شعوري بالوحدة كان يزداد وأن محاولات والدتي كانت فاشلة كي تخرجني مما أنا عليه أعلم أنها كانت تزداد قلقًا عليّ، ولكني بخير حتى وإن كنتُ لست كذلك، جاءت والدتي كي تخبرني أننا سوف نذهب يوم الأربعاء إلى المستشفى مرة اخرى كي تطمئن عليّ، لم أقتنع بما قالته ولكني وافقت كي أجعلها تطمئن.

(٣)

كنتُ مرهقًا فقررت إلغاء جميع مواعيد اليوم، كما أنني على معاد مع صديقي محمد، جلست في العيادة حتى جاء الموعد المحدد فذهبت لرؤيته.

_ أنت ناسي إني صاحبك وليا حقوق عليك وأني المفروض اشوفك وكدا؟

-والله يا محمد أنا يا في الشغل يا في البيت وبعدين بفكر أسافر تاني..

_ ايه يا ابني انت مش لسا راجع مصر..؟

-شكلي اتعودت على قعدة برا

_ طب المهم قبل ما تسافر، عايزك تجيلي المستشفى يوم الأربعاء

-ليه؟

_ كان في حالة عندي من اسبوعين كانت ف غيبوبة والتحاليل بينت أن معندهاش حاجة، فقلت لوالدتها تعرضها على طبيب نفسي يمكن يكون اللي حصلها كان بسبب ضغوط نفسية بس البننت مش مقتنعة، المهم أن والدتها اقنعت البننت دي إنها تجيلي المستشفى يوم الأربعاء علشان تطمن عليها ف أنت هتكون موجود وتحاول تتكلم معاها.

أخرج محمد هاتفه وحادث والدة الفتاة وأخبرها بكافة التفاصيل وأكد عليها الموعد المحدد وأن لا تجعل ابنتها تشعر بشيء.

كنتُ أجلس أمام النافذة وفي يدي كوب القهوة، وصوت فيروز وهي تقول "سألوني الناس عنك سألوني قلت لهم راجع أوعى تلوموني"

بدأ يوسف أن يخطر على بالي مرة أخرى ثم اكتشفت أنه لم يخرج من بالي حتى يعود إليه، ماذا لو لم تعود؟ ماذا لو مكثتُ عمري في انتظارك وفي

النهاية لم تأتي؟ ماذا لو سألوني الناس عنك؟ بيم سأخبرهم؟ هل سأقول لهم إنك مللت؟ أم تخليت؟ أم إنك اكتشفت بالنهاية أن ما تحمله لي ليست مشاعر حقيقية، أم أنني استحق أفضل منك؟ ولكني أريدك أنت حتى وإن كنتُ الأسوء، لا أريد جنة غيرك سوف أتحمل نارك، لما لم تخترع كذبه ترحل بها تليق بقلبي؟ لما تجعله يتسأل كل حين عن ميعاد رجوعك، لما تجعله يقول 'هذا ليس سبب للبعد لذلك سوف يعود مرة أخرى لربما كان يمزح معنا' "بيعز على غنى يا حبيبي، لأول مرة ما نكون سوا"

لأول مرة ما بنكون سوا يا يوسف، جاءت أمي كي تخبرني بارتداء ملابسي حتى نذهب فهزرت لها رأسي بالموافقة وكان شيئاً ما يخبرني أن سوف يحدث شيئاً ولكني لا أعلم ما هو.

(٤)

كنتُ جالساً أفكر في الفتاة التي اصطدمتُ بها منذ شهر، ثم رأيتها مرة أخرى منذ أسبوع لا أعلم سر انجذابي إليها، ولكنها تشغل تفكيري، كم كانت باهتة في أول مرة رأيتها فيها؟! كم كانت الدموع تسيل من عينيها كسيل المطر من السماء؟!، كم جذبني حزنها، ولكن ما جذبني إليها أكثر هو تدهورها في المرة الثانية، أعتقد أنني لو رأيتها مرة أخرى لصفعتني بسبب ما فعلته بها أول مرة.. لما لم تنتبه لوجودي في المرة الثانية؟ لما لم تنظر إليّ عندما رأيتها؟ وتهمار في وجهي بسبب فضولي لمعرفة سبب بكائها أو لتشكرني بسبب انقاذي لها من الشباب الذين كانوا يريدون التعرض لها؟.. جذبني محمد من شرودي لياكد على الوصول في الموعد المحدد.

ماذا لو؟ بعض الاحداث تتعلق ب "ماذا لو"، ماذا لو مكثت إلى النهاية؟ ماذا لو لم تتخلى عن قلبي؟ ماذا لو أنك هُنا؟ ماذا لو كنت آخر شيء تغمض عيني عليه؟ ماذا لو تشاركنا كوب القهوة معاً كل صباح؟ ماذا لو رقصنا معاً على أوتار قلبي؟ ماذا لو دُفنت ملامحك بداخلي إلى الأبد؟ ماذا لو لن تخذلني؟ ماذا لو استبدلنا وجع العالم ب ضحكة صغيرة منك؟ ماذا لو لم يحدث كل ما حدث؟ ماذا لو وضعت يدك على قلبي ف تختفي كل آثار الندبات التي بالداخل، ماذا لو ضمنت رأسك إلى صدري ف نبت وردًا بدلاً من الحريق الذي بداخلي؟ ماذا لو سكت العالم أمام نظرة عيناك، ماذا لو تلاققت أيدينا في نفس الطريق؟ ماذا لو مسار كل منا لم يختلف عن الآخر؟ ماذا لو أنك هُنا؟

كنت شاردة ولم انتبه أننا وصلنا، بعد وصولنا للمستشفى طلبت منا الممرضة الدخول لمكتب الدكتور محمد، جلست دون أن أنظر لشيء كانت أمي تتحدث معه عن سوء حالتي ولم يكن لدي طاقة لتبادل الحديث معهم وقول أنني بخير وأن ما بي لا يحتاج إلى أدوية.

وصلت إلى المستشفى قبل الموعد المحدد بربع ساعة، كنت بحاجة لشراب كوب قهوة حتى أستطيع التعامل مع الفتاة التي تدعي فريدة، ف محمد أخبرني بصعوبة التعامل معها، وبعد قليل من الوقت أتت فريدة ومعها والدتها، عندما دخلتُ إلى المكتب شعرتُ بشيء غريب، أيعقل أن تكون هي؟ أيجوز للصدفة جمعنا سوياً مرة ثالثة؟ كانت تنظر إلى الارض ولم تتحدث قط، كنتُ أريد أن أري ملامحها، أريد أن أتأكد أنها هي، لم أنتبه لنظرات محمد التي كانت تريدني التحدث كنتُ فقط بحاجة لمعرفة أي حقاً أم أنها

شخص آخر، عندما لم أتحدث حاول محمد فتح حديث معها كي يجعلني أتكلم وعندما رفعت فريدة رأسها ورأتني نظرت إلى بشيء من الدهشة.

_ هو أنت؟

- هو أنت؟

_ أنت إيه اللي جابك هنا!!؟

- حتى وأنتِ تعبانة بتزعقي؟ وبعدين أنتِ فريدة؟!

= انتو تعرفوا بعض؟

تحدثنا في أن واحد:

_ لا طبعًا

نظرت له بغضب ف من أعطى له حق مطاردتي والتحدث معي بتلك الطريقة حتى وإن كان سببًا في نجاتي من مكروه ما، تركت والدتي تتحدث مع الدكتور وأخبرتها أنني سوف أنتظرها بالأسفل.

أخبرت والدتها أنني سوف أنزل وأحاول التحدث معها وأخبرتها أن لا يوجد شيء يدعي القلق، وجدتها جالسة في ركنٍ بعيد، اقتربت منها ولم أتحدث، كانت حزينه بشكلٍ جميل، كنتُ أشعر بشيء غريب، أخذتُ نفسًا عميقًا ثم جلست بجوارها.

_ يومها مكنتش أعرفك ومكنش ليا الحق أنني أعرف مالك أحب أعرفك بنفسي أنا دكتور نادر أخصائي مرضى نفسيين وبما أنني بقيت الدكتور بتاعك خلاص ف تقدرني تجاوبيني؟

- أنا مش مريضة ومش من حقك تسألني وأنا مش محتاجه أعالج.

_ مش معنى أنك تتكلمي مع دكتور تبقي مريضة وبعدين المرض مش عيب ولو دورتي جوا كل شخص هتلاقيه مريض وبعدين خلاص اعتبريني صاحبك.. نظرت إليّ بعينٍ تملأها الدموع..
_ بس أنا معنديش صحاب.

لِمَا تركتني؟ لِمَا لم تنتظر؟ هل أزعجك صمتي؟ أم أزعجك كثرة حديثي؟ كنتُ لك كل شيء وعكسه لِمَا ذهبت؟ لِمَا رحلت وتركتني وحيدة حبيسة في سجنٍ أنتظر عودتك، أتعلم؟ أن مكثت قليلاً كنت سأخبرك عن حبي لك، كنت سأقول لك أحبك بعدد بُعدك عني، كنت سأصف لك عما يحدث أن لم تكن بجواري، كنت سأري لك قلبي بمنظار وجعي منك حتى تري كم هو يتألم من دونك، كنت سأخلق لك أحاديثاً في كل شيء تحبه ولا تحبه، أن كنت في حالة لاستيعاب شيئاً سأحدث معك عما يدور حولك في عملك، كنا سنتحدث عن كرة القدم، عن كل شيء يجعلك تستنشط تركيزاً، وإن كنت توهمني بأنك تنصت إليّ ولكنك ف الداخل لم تنتبه لحرفٍ واحد مما أتحدث، سوف أخبرك وقتها بحالي، واشكو لك منك سوف أفشي لك أسراراً رغبت في أخبارك بها من قبل، سوف أرمي ما بداخلي من حمل كي أتوهم إنك تشاركني إياه، وفي نهاية حديثي سوف أقول لك "هل تسمعي؟"، ف تستيقظ من شرودك وتقول لي "ها، نعم إنني انصت إليك جيداً، ماذا كنتِ تقولين؟ أرهقني كثرة تفكيري في اللاشيء، نظرت بجاني ووجدت الكارت الخاص ب دكتور نادر الذي اقنعني بحضور جلسات العلاج الاجتماعي عندما رفضت أن أذهب إليه، وأخبرني بعدم خسارتي لشيء أن جربت الذهاب بل ربما عندما أحضر معهم يشجعونني على التحدث، لا أنكر أنني فكرتُ في الأمر كنتُ بحاجة إلى سماع

مشاكل الآخرين كنتُ بحاجة أن أشعر ب أنني لستُ فقط من أعاني، لربما أوجاعهم تجعلني أشعر بصغر وجعي كنتُ حتمًا سأجن لكن لا أعلم لما كلما جاء بخاطري هذه الفكرة أهرب منها على الفور.

_مزهقتيش من القعدة لوحدك يا بنتي؟

-تعالى يا ماما.

حاولتُ أن أزيل آثار البكاء حتى وإن كان يبدو عليّ ولكنني لا أقوى على نظرة عيناها المليئة بالحسرة، أعلم أنني ابنتها الوحيدة وما تبقى لها في هذه الدنيا الفانية، أن كانت أمي أم أخرى لكأنت تجلس تشكي الآن من تجاوزي العشرين عامًا دون أن اتزوج وأنجب لها أحفادًا قبل أن يتذكرها الله، ولكن لأنها هي أمي وليست شخصٌ آخر فها هي تجلس بجانبى تُلملم ما تبقى مني نتيجة لهدمي من شخصٍ مجهول الهوية ولكنه يمتلك قلبي، لأنها هي أمي تربط على قلبي وتضميني إليها كي استكمل ما تبقى من دموعي بداخلها، لأنها هي أمي لو كان ب أمكانها لقطعت يوسف ومحت أثاره للأبد ولكنها تخاف على قلبي أثر فقدانه مرة أخرى، فقط لأنها هي أمي وليست شخص آخر تضع رأسي بداخل كفوفها، ولأنها هي وليست شخص آخر استعجب كيف ليدها الصغيرة أن تَساع كُبر وجعي نظرت إلى عيني وقالت:

_محدث يستاهل وجع قلبك ولا حزن عيونك..

- بس يوسف كان يستاهل يا أمي..

_لو يستاهل مكانش مشي يا فريدة..

وضعتُ يدي على قلبي قائلة:

-بس هو هنا حتى لو مبقاش موجود ف هو هيفضل موجود هنا، كل

حاجة بقت بايخة وطعمها مر مبحسش بالحاجة إلا لما يبقى جنبي، حتى بعد ما مشي يا أمي مستنياه يرجع أنا دايماً بحس إنه بيراقبني من بعيد بحس إنه معايا ف كل مكان وكأن قرينه سايبه وقرر أنه يبقي معايا أنا، معايا دايماً.

شعرت بثقلاً في قلبي ف أمسكتُ بقلبي كي أجعله ينزف ما بي من وجع..
 "اشعر بالرغبة في البكاء والدموع عالقة وكأنها تأبى الخروج قط، أجاهد لكي أبكي ولكن لا جدوى من المحاولات التي تنتهي بنتيجة سلبية، أشم رائحة حريق لا أعلم مصدرها، ربما هي رائحة روعي التي تحترق، رُبما؟ لا بالتأكيد هي رائحتها، ف هذه هي أسوء فترات قد مررتُ بها من قَبْل، لا أشعر فيها بشيء وكأنني صنم، أشعر طوال الوقت بعدم التركيز، استمع إلى الأشياء مراتٍ عديدة وفي كُل مرة استمع إليها أشعر وكأنها المرة الأولى وبعد نهاية تلاوتها أتطلب إعادة قصها لعل وعسي أن تكون هذه المرة الأخيرة وأجمع فيها خطوط عقلي المبعثرة واستجمعُ اي شيء، ولكن يؤسفني أن أقول إنه لا يوجد فائدة، ولكن ما يرهقني حقاً هو أنني أبتعد عن العالم، عن كل شيء، أشعر وكأنني أغرق في الجحيم، ولكنهم لا يكتثون بذلك، لا يروا أي شيء سوي أنني أتغير وأصبح بعيدة ولم أكن مثلما كُنت في أي شيء، ربما هم على حق، ولكنهم لا يعلمون أنني حقاً لا يوجد لدي ما أقوله لنفسي لكي يتواجد ما أقوله لهم، لذلك اكتفي بذكر أن كل شيء سوف يكون على ما يرام، ولكن لا بأس من قول أنه لا يوجد شيء على ما يرام، لا بأس من قول أنني ازداد سوءاً يوماً بعد يوم، لا بأس بأن يبدلوا كلماتهم بأنهم سوف ينتظروني حتي أعود من جديد بدلاً من مناوشة فكري أكثر، الأمر ليس بهذه الصعوبة ف أنني لن انتظر منهم قط أن ينشلوني من عْزَلتي واكتنابي بل أطلب منهم أن لا يزيدوا الضغط

عليّ، إنني حقاً مهلكة، أريد البكاء كي ينطفئ الحريق الذي يحدث بداخلي، ولكنني أخاف من زيادة الماء للحريق، مُخي عالق بالتفكير ف اللاشيء، أهلكني تفكيري في محاولة علم ما الذي يحدث، ولكنني أتوه.. أتوه بداخل أفكاري، تداخلت الأفكار بداخل بعضها ف لم استطع جمع أي شيء أو ربما تفكيكهم عن بعض، ربما حقاً غدا سوف يكون أفضل، أم ربما غداً سوف يأتي ولن نشعر به، ف كُل شيء أصبح مُر ليس له مذاق، أصبحت ذابلة، وحالي يزداد تدهوراً يوماً بعد يوم، عذراً لأنني لا أعلم ماذا أكتب أو أقول، عذراً لأنني لا استطيع تجميع شيء، عذراً لأنني هنا في عالم قبيحٍ مثل هذا"

تركتُ قلبي ووضعت قلبي بجانبه كنت بحاجة إلى النوم أكثر من أي شيء آخر، استيقظت على أنين والدتي ف ذهبت إليها مسرعة ف وجدتتها تنفَس بصعوبة أخبرتني أنها بخير ولكنها تبدو عكس ذلك تماماً ما أن أكملت حديثها حتى وجدتتها تقع بين يدي هرولت بها مسرعة إلى المستشفى لا أعلم كم لبثت حتى وصلنا ولكن فور وصولنا أبلغني الطبيب إنها بحاجة إلى عمل عملية جراحية بالقلب في أسرع وقت طلب مني أن استكمل الإجراءات اللازمة ودفع المصاريف التابعة للعملية، كان الوقت قد تأخر ولم يكن لدينا وقت قررت الذهاب لدكتور محمد كي يخبرهم بالبدء في العملية حتى احضر لهم المصاريف كي لا نضيع وقت ف هو يعمل بنفس المكان ولكن لسوء الحظ عندما دخلت إلى مكتبه لم يكن بالداخل وفي طريقي للخروج انصدمت بوجوده.

_ أنا أسفة افتكرت دكتور محمد هنا.

- ولا يهملك هو تحت بيمضي ورق عشان هنمشي خير.. أنتِ كويسة

اقعدي استنيه.

_ مفيش وقت يا دكتور نادر ماما بتموت جوا ومش هلحق أروح البيت
أجيب الفلوس واجي ممكن تبلغهم بيدأوا في العملية لحد ماجي لو سمحت.
- طب أهدي متعيطيش ومتشيليش هم حاجة واعتبري كل حاجة اتحلت.
ذهبت إلى المنزل واحضرت كل التكاليف وعدت مسرعة ولكني تفاجأت
بما حدث

_ حضرتك كل المصاريف اندفعت.

- يعني ايه؟ مين دفعها.

_ دكتور نادر خلص كل الورق.

بحثتُ عنه في كل مكان ولم أجده أخبرني أحد العاملين إنه قد رحل هو
ودكتور محمد صعدت لغرفة العمليات وجلست وحدي انتظر انتهاء العملية
كنت أقاوم وجعي والبرد يالله لم يعد لدي طاقة للمقاومة، حاشه لله أنني لا
اعترض.. ولكنني أصبحتُ ثقيلة، اكتافي لم تعد تساع لحمل كل هذا وحدي
دون أحد، أعلم إنك تسمعي أكثر من أي وقت مضي لذلك تختبر إيماني بك
أريني فرجك يا لله فلقد هزمني الوجد هذه المرة، لا تختبرني فيما فلم يعد لدي
سواها أمطر بمطر فرجك يا لله ثم اجهشت بالبكاء كطفل رضيع.

بعد ثلاث ساعات خرج الطبيب وأخبرني بنجاح العملية وأنه سوف يتم
نقلها للعناية حتى تفوق مما هي عليه وبعدها سيتم نقلها لغرفة عادية وأن
الأمر أفضل الآن ويمكنني رؤيتها أيضًا بعد قليل.

خرجت أُمي بعد اسبوع من أتمام العملية، حاولت من خلالهم أن أصل
إلى نادر ولكن أخبرني الدكتور محمد بسفره خارج البلاد لمدة اسبوعين،

وعندما طلبت منه أن يعطي له نقوده أخبرني بأن من الأفضل أن انتظر حتى يعود وأسلمهم له بنفسي، حاولت الاتصال به ولكن كان الهاتف مغلق دائماً، ف قررت الانتظار حينما يعود واذهب إليه واشكره على ما فعل، أصبحت أُمي أفضل حالاً وتخلّيت عن عزّلي وغرفتي كي أبقى بجانبها حتى تسترد عافيتها مرة أخرى

مر شهر ولم أستطيع الوصول إلى نادر، استردت أُمي عافيتها تماماً، عدتُ إلى غرفتي مرة أخرى، فكرت كثيراً أن أبحث عن عمل كي يخرجني من قوقعة تفكيري بما حدث وبما لم يحدث ولكن فكرة تعرضي لتتعامل مع بشر مرة أخرى تجعلني أدفن نفسي بالقوقعة أكثر، أريد البكاء، أطالب في حقي بالصراخ، لا أريد التحدث مع البشر وفي أن واحد لا أريد التحدث سوى مع بشر، سوف أجن، أريد أن أجلس مع شخص ما وأقص عليه كل ما أشعر به، كل ما أهابه وأريده، كل ما جعلني أصل إلى ما أنا عليه الآن وفي النهاية أقوم بمسح كل ما قصصته عليه قبل مدة كي لا يتذكر شيء وكى أشعر بالراحة نتيجة عن البوح بما بداخلي الذي لا يسترعى انتباه من هم حولي، أخرجني من تفكيري رنين الهاتف فكان نادر اتفقت معه على موعد غداً كي أعيد له نقوده لا أعلم لماذا لا أريد أن أراه ولكن على أي حال فله كل الشكر على ما فعله معي من قبل.

(٥)

ارتديت ملابسي ووصفت شعري وأخبرت والدتي أنني سوف أذهب ولن
تأخر وصلت في الموعد المحدد وجدته جالسًا في انتظاري، ذهبت إليه ثم
ابتسمت وجلست دون أن أتفوه بشيء.

_تشربي ايه؟

- لا مش عايزة أنا بس كنت عايزة اشكرك على اللي عملته معايا قبل كدا
وعلي الفلوس اللي دفعتها للمستشفى واتفضل فلوسك أهي..

_تفتكري إيه اللي يخلينا نتقابل تلت مرات وف كل مرة بتكوني محتجاني
أكثر من المرة اللي قبلها؟

'وقع سؤاله كالصاعقة على قلبي، نظرت إلى عينيه شعرت بالدموع تتكون
في عيني كان هادئًا للحد الذي يجعل قلبي يدوب، لم أجد ما أقوله، ولكن حتمًا
ف إنها صدفة لا أكثر ف أحيانًا يبعث لنا القدر من نتكئ عليهم.

- لما تجعل قلبي يرتبك هكذا؟

لاحظ ارتباكي وعدم معرفتي لجواب ف ابتسم قائلاً:

_ على العموم ياست أنا مش هاخذ الفلوس دي..

-نعم لا طبعًا.

_أسمعيني للأخر هنعمل اتفاق هتيجي تحضري معايا الجلسات
الجماعية ولما تخلص هاخذ منك الفلوس وطبعًا انت مش هتقبلي أن يكون
حد ليه عندك مبلغ كبير زي كدا.

"قال تلك الكلمات وذهب حتى لم يعطى لي فرصة القبول أو الرفض، شعرت ب أنني مقيدة ويجب على فعل شيء مجبرة عليه، ف أنا لست بحاجة للحديث مع أحد أو الاستماع لمشاكل الآخرين فيداخلي ما يكفي للسمع بل ويفيض منه، لو كنت هنا يا يوسف لكنت رفضت أن يحدث كل ما يحدث لي الآن، لو كنت حيًا يا أبي لما كان ذهب يوسف ولما كان حدث كل ما حدث..

لطالما كنت اخاف الظلام والوحدة، ولكن لم يخطر على بالي قط أن ما نرهبه ينبع من داخلنا، كنت أرهب الوحدة ووجدت أنني وحيدة رغم كثرة من حولي، كُنت اخاف الفراغ ولم ألحظ إنه ينبع من داخلي، كنت اخشي الفراق ولقيت أنني بلا هوية، كنت ارتجف من الظلام حتى أصبح بداخلي، كنت اخاف كل شيء حتي تمسك بي وسكن بداخلي، كنت أخافك حتى أصبح قلبي مرتطم بك، كنت أريدك حتي رحلت، بعد تفكير دام لوقتٍ طويل قررت أن أحضر تلك الجلسات وأعطي له نقوده وكل منا يذهب إلى طريقه، ف ليس بشأنه أن أصبح بخير أو لا؟ لم يهमे أمري لهذا الحد الذي يجعلني أشعر بالخوف؟ ذهبت في المعاد المحدد، أخبرني السكرتيرة أن الدكتور نادر في انتظاري بالداخل سألتها هل يوجد أحد معه؟ قالت لي أن الجلسة لم تبدأ بعد ولكنه أخبرها فور وصولي أذهب إليه.

_أفضللي، كنت عايز اقولك انك لو مش حابه تتكلمي انهاردة متتكلميش، أنا أوقات بكتفى ب اتنين أو ثلاثة يتكلموا في الجلسة وبنكمل المرة اللي بعدها، مش حابب أكون بغصب عليك
-ولما أنت مش حابب تغصب عليا جيتني هنا ليه؟

....

-انت بتعمل معايا كدة ليه؟

"هل ستصدقيني إذا اخبرتك أن الأمر متعلق ب قلبي ليس بي؟ شيء ما يجذبني تجاهك دون أن أدري ما هو، شيء ما يجعل قلبي مطمئن عند وجودك".

_قلتلك قبل كذا اعتبريني صاحبك، وبالمناسبة مفيش حد ينفع يقول ل صاحبه دكتور..

خيم الصمت علينا، انتظرنا حتى أتت المجموعة كاملة، جلسنا في غرفة كبيرة كُلِّ منا كان يجلس بعيداً عن الآخر، كانت الغرفة واسعة وبلا اضواء حتى لا يشعر أحد بالحرج، لم نكن نرى شيء، وكان يوجد موسيقى هادئة مريحة للأعصاب، كان الجو هادئ للحد الذي يجعل مشاعر تفيض منك وفي النهاية تشعر وكأنك تتحدث لنفسك ليس لأحد.

بدأ "علي" الحديث، كنت شاردة ولم انتبه لهم حتى لفت انتباهي ما كان يقصه علي

_انا على عندي ٢٤ سنة عايش مع أهلي، الموضوع ابتدى يزيد ويكبر عن حده من ساعت ما كنت ف ثانوية عامة.

_ايه يا على أنت فين؟

_الو يا ماما، أنا لسا خارج من الدرس نص ساعة وهكون في البيت

_نعم؟؟ نص ساعة؟ لا كتير الساعة بقت عشرة يالآ متأخرش..

_بابا أنا نازل اقعد شوية مع صحابي

_لاء يا على خلي صحابك يجولك هنا.

يا بابا أنا مبقتش صغير علشان تتعامل معايا كدة وبعدين أنا ولد يعني ده حقي.

يعني إيه ده حقك؟ اتفضل يالآ ادخل جوا ومش عايز كلام تاني أنا قلت كلمة وتتنفذ مفهوم؟

تعالى يا علي بص القميص ده شكله حلو؟

استنى يا بابا في قميص هناك شكله احلى.

لا أنا عاجبني ده وهيبقي حلو عليك.

بس يا بابا أنا..

مفيش بس هو ده اللي هناخده يعني هو ده.

=مكنش ليا رأي نهائي، كنت دايمًا بعمل اللي هما يقوله عليه أو بمعنى أصح اللي هما بيترضوه عليا، لحد ما خلصت امتحانات وظهرت النتيجة بتاعتي.

اصحي يا علي النتيجة طلعت..

بجد يا ماما؟ كام جبت كام؟؟

مبروك جبت ٩٨

=محسستش بفرحة ف عيونهم، كانوا فرحانين بالمجموع بس مكانوش

فرحانين بيا أنا، ماما وبابا كلموا الناس كلها علشان يقولولهم اني جبت ٩٨

انا هدخل فنون جميلة ..

فنون جميلة إيه الكلام ده انت هتدخل طب يعني هتدخل طب

انا مبحبش الطب وده حلمي من زمان وأنا بعرف أرسم يا بابا وأنت

عارف ده

_ بلاش كلام فارغ يا أما طب يامفيش تعليم.

= دخلت طب علشان مينفعش ابن المهندس يبقي عيل رسام زي ما قال، سقطت أول سنة فيها علشان مكنتش بذاكر ولا كنت بحضر، كانوا بيتعاملوا معايا زي أختي ف خوفهم عليا مكنتش ليا صحاب كل صحابي كانوا بيتريقوا عليا وشايفني مش راجل، لحد ما قابلت بنت وحيبتها، عيشت معاها أجمل تفاصيل حياتي.

_ أنا خلاص قررت اقول ل بابا واجي اتقدم ل باباكي، أنا مقدرش أعيش من غيرك.

_ علي أنا خايفة، باباك صعب جدا وممكن ميوافقش..

_ انا اللي هتجوزك مش هو، متقلقيش أنا هحاول معاه.

_ نعم؟ تخطب إيه أن شاء الله؟

_ واحدة زميلتي يا بابا وبنحب بعض بقالتنا سنتين.

_ شيل الموضوع ده من دماغك انت عارف اني حاجلك بنت صبري

صاحبي بنت محترمة وكويسة وبنت ناس.

_ هي كمان محترمة وكويسة وبنت ناس وأنا بحبها هي.

_ بس أقل مننا يا علي!!

_ الفلوس مش كل حاجة يا بابا، وفلوسها عمرها ما هتعيشني مرتاح،

العشرة والحب مبيجوش بالفلوس

_ مش هناخد واحدة مستواها أقل من مستوانا أنا قلت كلمة ومعنديش

نقاش وأنت عيل ومش فاهم قرارك ده، بكرة لما تفهم وتعقل هتعرف أن

المناصب أهم من الحب.

_ أنت عمرك ما هتفهم ولا هتتحس، أنت مشاعرك أبرد من أي حاجة ممكن تتخيلها، أنت دايمًا مخليني أحس أنني يتيم وأنت لسا على وش الدنيا.

_ اخرس يا حيوان...

_ أنت بتضربني يا بابا؟

_ واموتك كمان، شيل البننت دي من دماغك تمامًا وإلا هيكون آخر يوم في عمرك أنت سامع.

=حاولت أوصلها بكل الطرق بس تقريبًا بابا هدها، عمرهم ما ادوني فرصة للعيش والمواجهه، حتى حلبي اتخلت عنه ف سبيل رضاهم وانهم شايفينه تافهه واني لازم أكون حاجة كويسة، أنا عارف انهم عندهم خبرة أحسن مني وأوقات بيبقي خوفهم ده كويس وصح، بس هما مش قادرين يفهموا أن المفروض اجرب بنفسي علشان أعرف إيه هو الصبح من الغلط، قدرت استحمل كل قرارتهم وتدخلهم في حياتي في كل حاجة ماعدا هي حتى حياتي اللي هكملها بعيد عنهم لازم يتدخلوا فيها، حاسس أنني تايه ومليش رأيي، عايز أكون متمرد، نفسي اسمع نفسي وأنا بقول لاء، لما بقيت بتحط في موقف اختيار مبقتش بعرف اختار وكأني خلاص اتبرمجت أنني ألغي كل آرائي وهواياتي في سبيل رضاهم، وكأني خلاص اتمحيت!

دام الصمت لقليل بعد أن انتهى على من حديثه، جاء صوت فتاة من

ركنٍ بعيد

(٦)

_ انا نور عندي ٢٣ سنة ممكن نقول أنهم مش ملكي، حياتي كانت عبارة عن وسيلة ل بابا وماما للانتقام من بعض، هما منفصلين من وأنا طفلة صغيرة ومن هنا ابتدت المشاكل

_ هو فين بابا؟ ليه مش عايش معنا؟

= كانت أول الحكاية، كبرت نوعًا ما وابتديت استفسر، عايزة أعرف إيه سبب غياب شخص مهم زي بابا من حياتي؟ طب ليه ظهوره يبقي دايماً عامل خلاف بينه هو وماما؟ لحد ما وصلت ل إني خايفة منهم هما الاتنين مش من واحد بس.

_ أنا عايز البننت

_ مش هتاخذ البننت، دي من حقي أنا والدتها وأحق بيها منك

_ وأنا شايف أنني أصلح لها عنك يا هانم هاتي البننت

_ لاء مش هتاخذ البننت أبعد عني.

= كان اوقات المواقف اللي زي دي بتمر مرار الكرام وشوية زعيق وخلص، واوقات بتوصل للإهانة ومد الايد علشان كل واحد عايز ياخدي من الثاني وخلص، المشكلة إني لما كنت ببقي قاعدة مع أي حد فيهم مكنش بيفكر في حاجة غير انه ازاي هيخليني أفضل هنا من غير ما أروح للطرف الثاني؟ مكانوش بيفكروا فيا تمامًا

_ لو خيروكي بين حد فينا اختاريني انا

= كانت أكثر كلمة بسمعها من الطرفين مش من طرف واحد، كُل واحد

شايف انه أحق بيا، وكأني جايزة وبيتخانقوا على مين هيفوز بيها وبعدين
هتركن على الرف عادي، عمرهم ما فكروا أني محتاجة الطرفين.

_نور بتحيي مين فينا أكثر؟

=كأن سؤال مطلوب مني اجابو عليه بكل بساطة واريحية، وكأنهم جاين
يقولولي يالآ مستعدة تستغني عن عينك اليمين ولا عينك الشمال؟ طب م
الانين في الآخر عيوني انتوا بتتكلمو في ايه؟ هتقولي مثلاً أنتِ عندك عين
أضعف من عين ف الموضوع مُبسط، طب ما في كل الأحوال النتيجة واحدة
وهي إني مش هشوف غير بعين واحدة والرؤية مش هتبقى واضحة

_نور يالآ علشان تختاري بس خلي بالك إنكِ هتخسري اللي مش

هتختاريه

_نور حياتك هنا افضل

_نور انتِ اتمنعتي عن مامتك علشان بعاقبك

_نور انتِ اتحرمتي من باباكي علشان سابني

_نور مامتك وحشة ومبتحبكيش

_نور باباكي راجل مش سوي ومش خايف عليكي

=نور نور نور بس كفاية دي حياتي أنا مش حياتكم، ده قراري أنا
مش قراركم، أنا مش ذنبي أني أفضل طول حياتي عايشة بدفع تمن كام سنة
أنتوا عيشتوها سوا من عمركم، عمر ما حد فيكم بيفكر فيا ولا في مشاعري،
محدث شايف أنا عايزة إيه أو محتاجة ايه، أنا كنت باخد قرارات مصيرية زي
أنّي أحدد حياتي مع مين فيهم في الوقت اللي كان المفروض تكون فيه أكبر
حاجة شاغلة تفكيرني هي اني مش عارفة هلبس إيه بكرة وأنا خارجة مع

صحابي، خلافاتهم أثرت على حياتي فيما بعد، بقيت دائماً خائفة من فكرة الجواز وحاسة أنني هفشل، أنا دائماً حاسة أنني فاشلة

لم يدم الصمت كثيراً تحدثت فتاة أخرى معترضة على ما قالته نور
_بس أنا كان نفسي بابا وماما ينفصلوا.. أنا مريم عندي ١٩ سنة، مش
دائماً الانفصال بيكون قرار غلط اوقات بيبقى أرحم من حاجات كتيرة اوي
مبنتكشهباش غير متأخر

_ايه صوت الدوشة ده في ايه؟

_نامي نامي بابا بيضرب ماما برا

= ده كان رد أختي الكبيرة.. هي مقالتش كدة علشان معندهاش مشاعر أو
مش هاممها لأ، بس احنا اتعودنا، مينفعش يعدي اسبوع من غير ما يكون بابا
متخانق مع ماما وضاربها، وكان اوقات كتير مبيضربهاش، بس الطبيعي أنهم
كل يوم بيتخانقوا

_بس اتكلمي بصوت واطي

_في إيه يا مريم مالك؟ بتترعشي ليه أهدي

= مشاكلهم وخناقهم مع بعض وأني أصحى كل يوم على صوت زعيقهم
وصلني أنني أكره الصوت العالي واتعب جدا من الدوشة، مش كل الناس كانت
متقبلة ده ولا متفهمة أنني مبقدرش أتعامل بصوت عالي وبتعب ف مكنتش
بقدر أخرج من البيت اللي بالتالي هو مصدر تعبي

_طلقني

_لاء مش هطلقك

=كانت كلمة بتتقال كل يوم عادي جداً، وبابا مكانش بيوافق، حتى ماما
كانت بتطلبها منه وهي من جواها رافضة ولما سألناهم قالوا

_ أنا هستحمل علشانكم

_ أنا مستحمل علشان تتربوا ف حضني بدل ما تعيشوا وسط راجل غريب
=رد مش مقنع بصراحة، ليه غاصبين نفسهم أنهم يكملوا في حاجة ولا
هما ولا احنا بقينا قادرين أننا نستمر فيها؟ المشكلة أني بقيت شايفة من
وجهة نظري أن مفيش أي علاقة جواز في الدنيا ناجحة وهادية، أنا بكرههم
هما الاتنين ومش قادرة اشيل فكرة أن مهما كان دول أهلي ومينفعش أني
أوصل للمرحلة دي بس هما وصلوني للمرحلة اللي أنا فيها دي عادي جدا، أنا
بسببهم بقيت هنا، بسببهم بقيت معاكوا دلوقتي وفي وسطكوا!

أنهي نادر الجلسة بعدما أنهت مريم حديثها، أربكتني نظرات نادر التي كان
يوجهها لي من حين إلى آخر، ذهبت مسرعة قبل أن يتحدث معي
مر أسبوعين على آخر مرة رأيته فيها، لم أحضر الجلسات، كان يتصل بي
مراتٍ عديدة ولكنني لم أجب عليه، كنتُ بحاجة لمعرفة لماذا أذهب
للجلسات، هل حقًا للسمع والتحدث أم للتقرب من نادر أكثر وأعرف سر
اهتمامه بي؟ لن أنكر أنني أشعر بالراحة في وجوده ولكنني أحب يوسف،
وأنظره حتى يعود وأعلم أنه لن يتركني قط هو قال لي هكذا من قبل، لما
ذهبت يا يوسف؟

كنتُ لك وطن ولكنك لم تقدر على محاربة العدو ف هجرتي..
عيناي تحمل شوقًا إليك، وأضلعي تتمنى مكوثك بها، ويدي تريد أن يفك
أثرها ب قبضة يدك، وقلبي متيم بك، وعقلي مشغول بك، ف لما لم نتحدى
العالم بوجودنا سويًا، تحت أرض واحدة.
ماذا سوف يحدث لو ظلت أسمائنا مع أسماء العاشقين أم انك مغرم
بالفراق؟

(٧)

كنتُ أعلم أنها لن تأتي مرة أخرى، أو على الأقل لن تأتي في الجلسة القادمة ولكن لم اتوقع أن تختفي شهر كامل حاولت كثيراً الوصول إليها، منذ أول مرة رأيتها وهي سقطت بي أرضاً، أشعر بالاطمئنان عندما أراها، أود لو أن الزمن يتوقف عندها

وكيف لي أن لا أراها وقلبي ينبضُ بها

يزيد الحزنُ جمالها جمالاً، ولكن ما أجملها وهي كُـلُّ الجمال

يا أيها الرجل الغائب دائماً، ها أنا أعود وحدي من جديد، ها أنا أجلس وحيدة فالجانب المظلم من الغرفة واتذكرك، اتذكرك وأنت تتفوه بكلمات ظننت أنها حقيقة ولكنك هربت وجعلتني وحيدة من جديد، اشكوا الآمي لأركان الغرفة وأشعر أنني على وشك الجنون، يا أيها الرجل الغائب أريدك أن تعلم أنني استمررت بالعيش بدونك، يا أيها الرجل الغائب أريدك أن تعلم إنه لم يبقى لك مكانا بداخلي، بداخلي! أتعلم ما هو الذي بداخلي! أنا أشعر وكأنني بداخلي بركان، أود أن تعلم أنني سوف أجلس دائماً انتظرك، انتظر مجيئك ليتفجر به بُركاني وليس لأنني أريدك..

أخبرت والدتي أنني سوف أنزل لكي أجلس على البحر قليلاً سأمت من جلوسي بالغرفة وحيدة لا أفعل شيء سوي الكتابة والتفكير، قررت أن اذهب للخارج قليلاً وأشغل نفسي كي لا أفكر به، وعندما وصلت إلى الشاطئ تذكرت ووقفنا سوياً عليه.

ف وجدت نفسي كُلما حاولت الهروب منك أنجذب إليك أكثر..

جلست بعيداً عن الضوضاء أمسكت بقلبي وبدأت أكتب " مهلاً، أريدك أن تعلم شيئاً ما، إنني اكتشفت أن في غيابك كل شيء يصبح باهت، تَمُرُّ الثواني وكأنها دقائق، وتَمُرُّ الدقائق وكأنها ساعات، وتَمُرُّ الساعات وكأنها أيام، وتَمُرُّ الأيام وكأنها شهور، وتَمُرُّ الشهور وكأنها سنين، وتَمُرُّ السنين وكأنها قرون، كل شيء يَمُرُّ ببطء، كل شيء يَمُرُّ وكأنه حمل ثقيل يجعلني أتمزق، يجعلني أتذكر في كل لحظة إنك لست هنا، انتظرك دائماً على الرغم من إنني لا احب الانتظار وأشعر بملل إلا وأني انتظرك، انتظرك في كل لحظة وأنا على يقين بـ أنك سوف تأتي، ولكن مهلاً فماذا لو جئت بعد فوات الأوان؟! فالأشياء بعد أوقاتها ليس لها طعم، ف الدواء بعد الشفاء ليس له ضرورة، وأنت دوائي، عندما نتألم نبيكي ونريد مسكنات ف بعد الشفاء لا يوجد بكى، وأنت مُسكني ومَسكني، أشعر بالخوف مثل شعوري بـ حُبك تماماً، وبالرغم من ذلك انتظرك، ولكن يا سيدي انتظاري لك طال وأصبحتُ أنا باهتة"

تركت قلبي ولفتت انتباهي ضحكة فتاة ف ابتسمت فور النظر إليها، كانت تجلس بالقرب مني وتضع رأسها على كتف رجل وتشبك يدها ب يده، تذكرت يوسف وهمست لنفسي قائلة

ماذا لو سقط حزني مع سقوط رأسي على كتفك؟

ثم تذكرت كل ما مررت به أنا وهو وكل لحظانا معاً، عدتُ مرة أخرى أنظر إليهم ولكني شعرتُ بالتجمد في جميع اطراف جسدي، شعرت بالصدمة والذهول نتيجة لما رأيته.

_دكتور نادر كلهم اتجمعوا برا ومعاد الجلسة جه ادخلهم؟

-فريدة جت؟

_ لا يا دكتور..

-طب دخلهم..

يشغلني أمرها للحد الذي يجعلني لا أنتبه لعملي ولا لشيء آخر..

_اسمي سلمي عندي ٢١ سنة، الموضوع ابتدى لما كنت بحتاجهم ومش بلاقيهم، لما حسيت أني محتاجة لحضنهم وملاقيتهموش ف دورت عليه برا، كنت طبيعي زي أي بنت بحتاج لأمي تكون قريبة مني، بحتاج حضنها أوقات.

_ماما ممكن تاخديني ف حضنك؟

_مش فاضية يا سلمي أنتِ شايفاني بعمل ايه؟

_ماما ايه القمر ده، ما تجيبي حضن..

_بس يا بت أطلعي برا..

_يووووه أنتِ لازقة فيا كدة ليه ابعدني عني الجو حر..

=هي عمرها ما فهمت أن لزقتي فيها ما هي إلا محاولة إني أقرب منها، كانت بتفرق بيني وبين اخويا الكبير في المعاملة، عمرها ما فهمت إني بنت والمفروض يكون ليا معاملة تانية.

_بابا أنا تعبانة.

_روحي بكرة للدكتور.

_لأ أنا عايزة اعيط.

_في حاجة وجعاكي؟

_حاسة أني مخنوقة..

_من ايه؟ بتاكلي أحسن أكل وتلبسي أحسن لبس وبتتعلمي تعليم كويس

مفيش سبب يخليكي مخنوقة....

=وده بابا، اللي طول اليوم في الشغل وعمره ما فكر يطبب عليا ولا

يقولي كلمة حلوة، دائماً بعيد عني، وطلاما بيديني فلوس وياكل ويشرب يبقي خلاص دوره انتهى، بيتنا كان غير أي بيت أنت طالما بتاكلي وتشربي يبقي جريمة ف حق الدولة لو اشتكيتي من أي حاجة بلاش دلع، مكانوش بيفكروا أني بحس وليا احتياجات تانية غير الأكل والفلوس، زي حضنهم مثلاً.

_هنخرج انهاردة كلنا؟

_ماشى..

= كان معظم وقتي بحاول أقضيه مع صحابي وأخرج معاهم علشان محسش ب أي تعب، بس في نهاية كل يوم بكتشف أن كل المحاولات اللي بعملها فاشلة وأن أي حاجة بحاول أشغل نفسي بيها عمرها ما هتعوض الدفا اللي ف البيت.

_أنت فين؟

_وحشتيني..

_وأنت كمان

_انا بحبك

_متسينيش

=ملقيتش الحب في بيتنا ف قررت أدور عليه برا، ارتبط وحببت واتحبيت زي اي بنت عادي جدا واتخطبنا

_انت بتقول إيه يا دكتور؟

_زي ما بقولك، الأشاعات أكدت أن عندك كانسر ف الثدي ومحتاج عملية بسيطة وهيروح.

=عملت العملية ونجحت، بس مع الأسف فرحتي مدامتمش لوقت طويل

_أنا أسف يا سلمى بس الكانسر رجع تاني والمرة دي هنشيل الثدي

_ أنت ما يتردش عليا ليه؟

_ أنت بتتكلم كدة ليه؟

_ أنت ازاي تنسى مناسبة زي كده؟

= من بعد ما عملت العملية وهو متغير معايا لحد ما قالي إنه جاي وعازب بابا في موضوع.

_ خدي يا سلى دخلي ل خطيبك وأبوكي الشاي.

_ حاضر يا ماما..

_ أنا أسف يا عبي، بس أنا مش قادر اكمل مع بنتك، بصراحة بنتك مش كاملة جسمها مش زي باقي البنات وأنا مش قادر اشوفها بالشكل ده خصوصًا كمان أني مش ضامن بعد الجواز ممكن يرجعها تاني ولا لاء، وأنا بصراحة من حقي أعيش مع بنت جسمها طبيعي.

= أيوا سمعته وهو بيقول ل بابا كدة، سمعته وهو بيقول إنه مش قادر يكمل معايا بعد ما خلاص كان فاضل على جوازنا شهرين، موجعنيش كلامه، الصدمة مكانتش ف الكلام الصدمة كانت أن الكلام ده منه هو مش من حد غيره، راهنت عليه بعمري وهو ضيعلي عمري كله، كنت محتاجاه بس يفهم قبل ما يمشي أن القلب ملهوش أي علاقة بالشكل، وإني كنت هحبه واستحمله واراعي ربنا فيه ب قلبي مش ب جسي أو شكلي، كنت عايزة بس أقوله أن اللي حصلي مكانش بمزاجي وإني قادرة أمشي على رجلي، وبمشي وهقدر أسنده لما نعجز سوا واناوله كباية المياها لما يتعب، كنت بس عايزة أقوله أني بحبه.

انتهت سلى من حديثها، ثم بدأت فاطمة بالحديث..

(٨)

_أنا اسعي فاطمة عندي عشرين سنة، أنا معنديش مشكلة،
متستغريوش، أنا وحيدة أمي وأبويا.

_بابا أنا خارجة.

_ماشي يا حبيبتي.

_ماما أنا عايزة دي.

_حاضر.

=طلباتي كلها مجابة، مجربتش أن حد يقولي لاء قبل كده.

_هتاكلي؟

_اه.. بس في اوضتي.

=حياتي كلها عيشاها ف اوضتي، حياتنا هادية لدرجة اننا بنشوف بعض

بالصدفة، حياة روتينية مملة مفهاش أي مشاكل ولا اختلافات.

_ازيك؟

_بخير وأنت؟

_بخير..

=معنديش صحاب، كلهم مجرد زمايل وبس، وللعلم الموضوع مش متأثر

فيا، اللي متأثر فيا أن مفيش حاجة!

_ماما أنا نفسي أحس أني مضايقة بسبب حاجة.

=أنا أوقات كتير بحس بكده، نفسي مشاعري تتحرك سواء بالضيق أو

بالفرح حتى أو الحزن أو أي حاجة، نفسي أحس أني بعيط علشان سبب،

حياتي فاضية لدرجة أني مش حاسة ب أي حاجة تجاهه اي حد، مش حاسة ب أي مشاعر فعلا.

_أنا نفسي اتكسرت وابقى مجروحة، تعرفي ياماما؟ كان نفسي أعيش حياة مختلفة عن حياتنا بالرغم أن ألف بنت تتمناها.

=أنا فعلا مبحبش حياتي، أنا دايمًا مقتنعة أن الحاجة اللي بتكسرنا بتزرع فينا حاجة أقوى وبتعلمنا حاجات كتيرة أوي، وأنا طول حياتي محتاجة أتعلم، محتاجه أحس أن حياتي مهمة وحقيقي أنا مشكلتي أن مفيش أي مشكلة.

انتهت فاطمة من حديثها، أحتلت الموسيقى المكان لم يتحدث أحد لفترة طويلة، ثم فجأة قطعت ولاء صوت الموسيقى بصوتها قائلة.

_ أنا دايمًا حاسة بالذنب.. أنا ولاء عندي ٢٤ سنة، الموضوع بدأ منهم هما مش مني أنا.

_بابا ممكن أخرج مع صحابي؟

_لاء

_بابا أنا عايزة أجرب دي.

_لاء

_بابا يعني ايه...؟

_لاء

_بابا انا..

_لاء

=من صغري وهو بابا دايمًا بيعترض على أي حاجة، ده لاء وده لاء وده

لاء، عمره ما اداني مساحة أني أجرب وأغلط وأتعلم.

_ أنتِ كنتِ فين؟

_ أنتِ اتاخرتي ليه؟

_ هاتي تليفونك ده.

_ بتكلمي مين.

_ مفيش تليفونات بليل.

_ مفيش دروس برا.

_ مفيش كلام مع حد منعرفهوش.

=مكنش بيثق فينا أبدًا، كان دايمًا بيشك ف كل حاجة حواليه، من كتر م كان ضاغط علينا بأنه يرفض كل حاجة عايزينها ف بقينا نعملها من وراه، مكنش هيخسر حاجة لو كنت عملت الحاجة دي قدام عينه، هو اللي خلاني أعمل كل حاجة من وراه وأجرب كل حاجة هو منعني منها قبل كده، مش فضول بس يمكن عند فيه.

_ شكلك حلو..

_ أفندم؟

_ عيونك جميلة

_ ضحككتك حلوة أوي

=ابتديت اعمل حاجات مكنتش أتمنى أنها تحصل، اتعرفت على ولد..

المشكلة إنه كان متجوز، كان طيب جدا حنين عليا بشكل ميتوصفش.

_ ها عملتي إيه انهاردة؟

_ ناويه على إيه؟

_ نفسك في إيه؟

_ أحكي لي أنا سامعك..

_ أنا موجود..

=كنت بلاقي فيه اللي كان نفسي يكون موجود في بابا، كان بيسمعي ويتكلم معايا ويشاركني رأيي ويحسني أي مهمة، لحد ما حصل اللي كنت خايضة منه.

_ لأ متروحش البيت دلوقتي أقعد معايا شوية.

_ متخاف مع مراتك؟ هي اللي غلطانة..

=حبيته.. أيوا حبيته.. حبيته وأنا عارفة أن اللي بعمله ده غلط ومينفعش أعمله بس كان غصب عني، قربنا من بعض جدا، محدش أعترف بمشاعره، كنت أوقات بحس إنه بيحبني من تصرفاته، فضلنا على الحال ده سنة ونص وكنت بتعلق بيه أكثر وأكثر وبحاول اتلاشي احساس الذنب اللي كان بيكبر جوايا، كنت بقنع نفسي أني من حقي أحب وأتحب وإن الموضوع عادي.

_ أنا عارفة إنك متجوز، وأن اللي بينا مكانش ينفع يبقى موجود بس أنا حبيتك واتعلقت بيك، ومش قادرة أبعد عنك، أنا موافقة أكون في حياتك حتى لو أنت متجوز، أنا بحبك..

=مراته شافت الرسالة اللي كنت بعتها له بعبرله فيها عن مشاعري تجاهه، وانهارت وسابت البيت.

_ أنتِ إيه اللي أنتِ عملتيه ده؟

_ إيه في إيه؟

_ بصي يا ولاء أنا مش عايز أعرفك تاني الظاهر إنك اتعديتي حدودك

احنا مجرد صحاب وبس وأنا بسبب هبلك وجنانك ده هخسر بيتي وبنتي.
 =كلمني اتخايق معايا وقفل ف وشي، هو عنده حق أنا اللي كنت بظهر
 مشاعري بطريقة مش صح، أنا كنت عارفة أن الموضوع كله غلط من الأول
 ومع ذلك كنت مكلمة وبتعلق بيه أكثر.

_أنا أسفة، أنا عايزة اقولك أن مفيش أي حاجة بيني وبين جوزك، احنا
 مجرد صحاب والله صدقيني أنا اللي حبيته وحياة بنتك جوزك ملهوش أي ذنب
 ف اللي حصل تمامًا.

=رحت لمراته وكلمتها وبعدين مشيت، وكنت بتابع اخبارهم من بعيد لأن
 احساسني بالذنب كان مموتني، بنته تعبت ودخلت المستشفى رحت أظمن
 عليها من بعيد أو كنت بتلكك علشان أشوفه معرفش المهم أني رحت، شفته
 وهو بيجري وأول ما مراته شافته اترمت في حضنه ونسيوا كل حاجة،
 مزعلتش أني خسرت حبه اللي كان من طرفي أنا وبس، مزعلتش أني هرجع
 لوحدي تاني، أنا بس زعلت أن ازاي كنت هستمر في العلاقة دي واخليه يحبني
 واخرب عليه حياته أكثر من كدة، مشيت وقررت أني هتخلص من مشاعري
 بأي طريقة، بس أنا لسا حاسة بالذنب ولسا بحبه، مبعرفش أنام بسبب
 احساسني ده، أنا عارفة أن أنا السبب وأن أنا اللي كملت فيه من البداية بس
 مقدرتش أتحكم في قلبي، مكنتش أعرف أني هوصل لكل اللي وصلته ده..

بعد انتهاء الجلسة أخبرتني السكرتيرة بوجود فتاة في الخارج تنتظرني ف
 سمحت لها بالدخول.

_ياسمين إيه اللي جابك هنا؟

-وحشتني يا نادر...

_وحشتك؟ بالسهولة دي كدا وياترى رجعتي ليه؟

-نادر أنا..

_أنتِ ايه؟ أنت اتخليتي عني ف أكثر وقت كنت محتاجك فيه، بعيتيني وجريتي ورا الفلوس كنتِ دايماً بتستغلييني وقلت مش مهم هاتلها اللي نفسها فيه اتجوزنا وعملنا أحسن فرح ممكن أي حد يتمناه طلبتي أننا منخلفش ف أول جوازنا وقلت ماشي يمكن مش مستعدة تشيل مسؤولية دلوقتي كانت كل طلباتك مجابة إنما تبيعيني مع أول وقعة علشان الفلوس؟ أنتِ كنتِ عارفة أن غصب عني وبعد م والدي توفى اكتشفنا أن علينا ديون وكان لازم أبيع كل حاجة وعدتك أن هرجع أقف على رجلي تاني وأحسن من الأول بس الموضوع محتاج وقت ف استحمليني الفترة دي قلتي لا مش هبيع الشقة ومش هقبل أعيش ف بيت عادي قلت طيب مش مهم وبعدين أول م تعرفي أني بيعت العربية تطلي الطلاق وتقولي إنك مش قادرة على المستوى ده؟ رحتي اتجوزتي علشان خاطر الفلوس وأول ما تسمعي إني بقيت من أشهر الدكاترة اللي ف البلد تقررني تنفصلي وعايزة ترجعيلي بالسهولة دي كدا؟ أنتِ إيه ردي عليا أنتِ إيه؟

_نادر أنا أسفة أنا لسا بحبك وحقيقي مش عارفه أنساك.

-وأنا كمان أسف يا ياسمين بس أنا كمان مش قادر أفتكرك..

تركتها وزهبت لم أكن أتخيل حياتي من دونها ولكن أصبحت اليوم لن أستطع تخيل حياتي بوجودها، ف ثمة أشخاص قدر حبنا إليهم قدر كرهنا لهم، الأمر لم يقتصر فقط على العدو فهو فالبداية والنهائة عدو يمكننا تخيل اي شيء يمكنه فعله لضرنا وإنما ماذا بالضربة التي تأتي من أعز

الأشخاص؟ ماذا بالضربة التي تأتي من مَنْ كنا نحتمي بهم من وجع الحياة وأصبحوا هم الوجع فَمَنْ سنحتمي إذا؟

ذهبتُ إلى نادر في عيادته ولم أجدته كنت بحاجة لوجوده ولا أعلم لِمَ هو؟ أشعر وكأنني أريد أن أقف وراء ظهره كطفلة تتحامي في أبيها من العدو ولم يكن العالم لي سوى عدوي الأكبر..

كنت أهرب من كثافة العالم إليه ولكنه لم يبقى ف لِمَ أهرب؟ تضيق بي المدن والطرق رغم وسعها، فكيف لبلد تتحدث عنها الأمم جميعًا لا يوجد بها مكان يساع بي؟ وبالرغم من سخونة الجو إلا أنني أشعر بالبرد في قلبي..

أسير في الشوارع كطفل بلا أم، كنت أريد أن استوقفهم وأصرخ لم يحدث لي كل هذا؟ لِمَ يعد قلبي يساع لهذا الحزن وحده، ف يظهر شخص من بينهم ويتقدم نحوي ثم يتسم ويعتذر لي نيابة عن العالم ثم يدفني بين أضلعه..

أريد أن يمسك بيدي أحدهم ويقول لي أن كل شيء سيكون على مايرام حتى وإن لن يحدث ذلك، ويظل رابط يدي بيده حتي نصل معًا إلى بر الأمان، إلى حياة مليئة بالورد والفراشات ولا يوجد سوانا لا يوجد فراق ولا حزن..

كنتُ بحاجة إلى عناق طويل ربما يسقط مني الحزن بعده.. أمسكت بهاتفي ثم أرسلت لنادر رسالة بأنني بحاجة إلى مقابلته الآن، وبعد عشر دقائق أرسل لي موقع بالمهندسين وأخبرني إنه يتواجد هناك الآن، فذهبت إليه..

_أزيك عامل إيه..؟

-ليه اختفيتي؟

_محتاجة أتكلم..

-علي طول سامعك..

_كنت عايشة حياة هادية وطبيعية، لما دخلت المدرسة كنت انطوائية بحكم أن ماليش أخوات ومكنتش بعرف أتعامل مع حد، بابا الله يرحمه كان أقرب شخص ليا كان هو صاحبي وحببي وأخويا وأبويا، كانت كل ما الدنيا تزعلني مبلاقيش غيره أتحامى فيه وأنا على طول الدنيا مزعلاني يا نادر..

كنت زي أي بنت ف الدنيا محتاجه يبقى لهما صحاب، الموضوع بدأ بأنهم كانوا بيصاحبوني علشان ياخدوا الأكل بتاعي واحنا صغيرين، وأنا كنت بحتاج أحس إنهم محتاجني ف كنت بديهم الأكل وأنا فرحانة إنهم بيطلبوا مني حاجة، كنت بتعرض لنوعين نوع بيصاحبني أيام الأمتحانات علشان كنت شاطرة ف هتبقى مصلحة ليه ونوع كنت ببقى ليهم البديل، كانوا دايمًا بيركنوني على الرف لحد م قررت أشيل كل التراب اللي كان عليا من الركنة وأقول لا مش هديكم مصلحتكم لا مش هكون آخر اختيار ليكم طبعًا كلهم بعدوا لأن أسباب وجودهم أختفت ف مبقاش ليا لازمة بالنسبة لهم..

مع كل بداية سنة جديدة كنت بقول لنفسي خلاص هانت المرة دي هتلاقي حد تكوني رقم واحد ف حياته المرة دي هتلاقي اللي يكون موجود علشان كيان فريدة مش علشان حاجة تانية..

لحد ما دخلت الجامعة ولقيت نفسي مش عارفة أكون منافقة زهم، كانوا دايمًا بيحسسوني أني غريبة عنهم كنت دايمًا بشوف نفسي قليلة ف عنهم لحد م عرفت يوسف وكل الحاجات السوداء اتحولت لورد، حبيننا بعض

كنت بحس وأنا معاه أني مالكة كل الكون ف إيدي مكانش بيخليني أحتاج لأي حاجة خالص، اتخطبنا كان هو خالص جامعة وأنا كان قدامي سنة، وبعدين اتخرجت وحددنا اننا هنتجوز بعض ست شهور وبعد فترة بابا توفي طبعًا كأني خسرت العالم مش خسرت بابا، اتكسرت ومبقاش باقيلي حد غير ماما ويوسف وكان بيحاول يصبرني بكل الطرق منكرش أني حسيت إنه أتغير معايا بس كنت بقول لاء محصلش، اتفقنا أننا هنكتب الكتاب عادي ف معادنا بس مش هنعمل فرح علشان يبقي معايا بشكل أكبر لأنني كنت ف حالة صعبة جدا، وف يوم كنا قاعدين بنتكلم عادي جدا وكنا كويسين أوي وعدني إنه هيكونلي سند ومش هيحسني بغياب بابا تمامًا وفضل يقول حاجات زي كذا كتير لحد ما نمت، نمت وأنا مطمئة أن في حد ف ضهري وأن خسارة بابا مش هتكون كبيرة أوي ويوسف هيعوض الغياب ده ولما صحيت أتأكدت أن مفيش حد بيعوض غياب حد وأن اللي راح هيفضل مكانه فاضي للأبد، صحيت على رسالة منه بيقول فيها "أنا أسف بس أنا مش قادر أكمل ف المسرحية دي أكثر من كذا" .. مسرحية؟ بيوسي كل اللي بينا ده مسرحية؟ حاولت أوصله بكل الطرق لكن معرفتش تعبت جدا وبعديها بفترة دخلت ف غيبوبة أسبوع هما بيقولوا كذا بس الاسبوع ده كان يوم بالنسبالي أحلى من حياتي كلها، تعرف يا نادر؟ أنا مستعدة أضحي بعمرى كله بس يطلع اليوم ده حقيقي مش ف خيالي أنا وبس، فضل مختفي فترة كبيرة جدا لحد م شفته بالصدفة من ساعتين مع بنت تانية يا نادر..!

في السادسة صباحًا على البحر بالتحديد كنتُ أمتلك نصف العالم بيدي والنصف الآخر أمام عيني، فدائمًا ما تكون يديك بمثابة عالم بالنسبة

لي وعينيك هي تكملة هذا العالم، نظرت إليك ثم ابتسمت قائلة:

_ هو ده حلم؟

-لا أنا جنبك.

وضعت يدي على قلبي وغمضت عيني..

_بتعملي إيه؟

- بحلم، بحلم حلم.. حلو أوي كنت كل يوم بستناه يجي علشان أحلم بيه من تاني، مكنتش أتوقع أبدًا انه يتحول لحقيقة وتكون! تكون معايا هنا ف المكان ده من تاني، وبصراحة مش عارفة إذا كنت هفضل سامعة صوت دقات قلبي وهي بتناجيني علشان أحضنك وأفضل ساكتة كدا كتير ولا لا...

نظرت إلى السماء ثم إلى عينيك لم أستطيع أن أحدد من فيهم صافي

أكثر؟ ف تنظر لي وتقول

_أنا بحبك يا فريدة.

-وأنا بحبك يا يوسف.

ثم تأخذني بين يديك ف أغمض عيني واستنشقت نسمة هواء صافية، وأفتحها مرة أخرى لأجد نفسي في غرفتي والشمس تتسرب إلى غرفتي وتعلن حضورها وأجد أن ليست الشمس فقط هي من أعلنت عن حضورها الحلم أيضًا أعلن إنه حلم وغيابك أعلن أن ليس له رجوع..

فتحت نافذة الغرفة على مصاريعها جلست وفي يدي كوب القهوة وأمسكت قلبي من الجانب الأخر، وتذكرت يوسف وأن لا يوجد أمل للرجوع مرة أخرى حتى وإن عاد ف ما انكسر بداخلي ليس له رجوع، وتذكرت حديثي مع نادر البارحة واتفاقي معه على إنني سوف أنسى ما مضى وابدأ حياة جديدة

واستكمل حياتي بشكل مختلف، بحثت كثيرا على دفتر مذكراتي ف لقد كان معي بالأمس ولا أعلم أين أختفي، حزنت كثيرا ففكرت أن أكون قد فقدته عند البحر ولكنني أتذكر جيدا أنه كان معي، ما أحزني ليس فقدانه بل فقدان ما فيه، كان بداخله الرواية الخاصة بي وبعض مقولات قد كتبتها من قبل لا بأس سوف ابدأ من جديد أمسكتُ بمذكرة جديدة وبدأت أن أكتب..

استيقظ كل يوم في ذلك الوقت يقلقني صداعي الدائم وكأنه يتزايد في هذا الوقت بالتحديد من كل يوم، أجلس على حافة السرير في ظلام غرفتي الدائم وضوء الشمس يتسرب إلى غرفتي وكأنه يقتحمها ف أغمض عيني، لا أود أن أشاهد تلك الإضاءة، لا أود أن أشاهد أنوار قط، أود أن أجعل الظلام يحتل غرفتي مثلما يحتل حياتي تمامًا، تتزايد الذكريات ويتراكم الشعور بالوجع أشعر بنور الشمس يزداد ف أغمض عيني أكثر وأكثر ولكن لا محالة أعلنت الشمس عن مشاركتها لظلام عيني، أعلنت الشمس عن وجود الأضواء والأنوار، أعلنت الشمس عن وجودك أيضًا".

فماذا لو كنت شمس يومي يا نادر؟ ماذا لو تعلق بك ف رحلت كالسراب؟ لماذا لم تأتي من قبل؟ أتعلم كم كانت ستبدو الحياة أكثر لطفًا من ذي قبل؟ ولكن نحن نأتي في حياة بعضنا لبعض في الوقت الذي يراه الله مناسبًا لنا، ف الله لم ولن يختار لنا ما يضرنا بشيء ف كل شيء مدبر من عنده..

أعلم أن ما أود فعله يسمى انتهاك للخصوصية ولكن لم أستطع منع فضولي من قراءة ما بداخل دفتر مذكراتها، طردت ذلك الوسواس واغلقت نور الغرفة ثم قررت ذهبت إلى النوم وفي اليوم التالي اتصل بها كي أخبرها

بوجوده معي، ظللت اتقلب يميناً ويساراً ولكن لا جدوى قمت مسرعاً واقنعت نفسي أن ما سأفعله ليس بجريمة وسوف اعتذر لها عندما أراها على قراءتي له، كنت أود أن أعلم الكثير عنها قمت بأعداد كوب قهوة ثم جلست في النافذة وبدأت أن أقرأ ما بداخله وبعد أربع ساعات انتهيت من قراءته..

كنت أشعر بالذهول هل هي حقاً من قامت بكتابة الخواطر التي بداخله أم شخص عظيم متمكن من كتابته ولديه العديد من الكتب الناجحة، والرواية أيضاً التي مدونة بها في غاية الروعة، كيف لم تفكر في نشرها؟ أنا على يقين بنجاحها بشكل كبير سوف أحاول اقناعها بذلك، أمسكت هاتفني وأرسلت لها رسالة ثم ذهبت إلى النوم.

كانت الساعة الثالثة فجراً ولم أغفو فقررت الذهاب للنوم بجانب والدتي، تركت حزني وقلبي بالغرفة ثم ذهبت إليها وجدتها تقرأ في كتاب الله وضعت رأسي على كتفها حتى تنتهي، بعد أن انتهت ضمتني إليها..

_أنا عارفة إنك هترجعي أحسن من الأول لازم تتعلمي يا فريدة أن الحياة مبتقفش على حد.

- المشكلة مش كدا المشكلة أن اللي راحوا بياخدوا معاهم كل حاجة، بيروحوا بعد م طاقتنا في الحب والفرح وكل حاجة تروح فبالتالي مش هيبقي في حاجة جوايا اديها لأي حد جاي من تاني، والمشكلة الكبيرة يا أمي هو أن مكانهم بيفضل فاضي جوانا للأبد وحتى لو قدرنا نخلق حاجات جديدة مع أشخاص جديدة معتقدش إنها هتبقى بنفس احساسنا واحنا بنجرها أول مرة.

ممكن تبقى أحلي! صدقيني زي ما بقولك كدا، الحب الحقيقي يا بنتي مش بيبقى أول علاقة مريتى بها، ياما ناس كثير عاشت طول عمرها بتحب وفي الأخر اكتشفت إنها بعد كل ده ملقتش الحب الحقيقي، والحب الحقيقي هو اللي بيدوم في الأخر مش هو أول علاقة يا فريدة، عيشي يا بنتي أدي قلبك حريته علشان تعرفي تتنصي.

قلبي لم يعد يساع سوى حبك يا أمي ف باي حق تطالبين بصنع علاقات جديدة؟

استيقظت من النوم وكنت أشعر أنني أفضل حالاً..
تتساقط مني مع صباح كل يوم جديد ف أشعر أنني أتنفس بشكل أفضل
فياليت كل الأوقات صباح يوم جديد.

أمسكت هاتفي فوجدت رسالة من نادر أرسلها لي في الخامسة فجراً..
"أنتِ عظيمة، أنتِ فعلاً فريدة يا فريدة، الدفتر بتاعك معايا.. تصبجي
على خير"

شعرت بدقات قلبي تتصارع بقوة ودارت برأسي عدة اسئلة، هل قرأ ما بداخله؟ أم إنه يقول هذا الكلام بلا سبب؟ هل أعجبه؟ وبعد قليل وجدته يهاتفني كي نحدد موعد لاسترد الدفتر الخاص بي ثم أغلقت الهاتف وبعد قليل شعرت بدوار شديد جلست في السرير وجاءت أمي واعطتني دواء ولكن كانت الحرارة مرتفعة، أرسلت رسالة لنادر بالاعتذار عن الموعد بسبب مرضي المفاجيء..

صرت أسبوع جالسة في السرير والمرض يفتك بي..

كان حبك بمثابة لعنة يا يوسف عندما قررت أن أتوقف عنه فتك بي أرضًا كأنك لم تكتفي بتدمير قلبي ف قررت الانتقام من جسدي أيضًا..
مر شهر وتعافيت تمامًا كان نادر يطمئن على يوميًا وطلب أن يزورني في المنزل ولكنني رفضت، بعد يومين نزلت من أجل مقابلته..

_فريدة ليه مفكرتيش تنشري روايتك؟

"كان حلمًا سقط مني مع سقوط كل شيء وارتخت يداي ولم أستطع الامساك بهم".

-كنت كتبها قبل ما بابا الله يرحمه يتوفى وكنت هنشرها بس كل حاجة اتلغبطت بعد كدا.

_هو أنتِ باباكي متوفى بقاله قد إيه؟

-عايز تعرف يعني أنا ويوسف منفصلين من أمتي؟ كان ممكن تسأل عادي على العموم سنتين.

_طب مش ناوية تنشرها؟ أنا أعرف ناس كتير ممكن تساعدك في الموضوع ده وفعلا يا فريدة الرواية هتنجح أوي وأنا واثق من ده..

-مش عارفة يا نادر حاسة أني مش حابة دلوقتي وبعدين كلها عشر أيام والتقديم هيتقبل وأنا مش جاهزة نفسيًا ف ممكن نخليها المعرض الجاي على الأقل..

_دماغك ناشفة أوي...

- طب أنا همشي علشان الوقت اتأخر تصبح على خير..

عدت إلى المنزل شعرت بثقل روحي فذهبت إلى الله كي افرغ ما بي، جلست أمامه وخلعت ستار روحي بكيت له كما أنني لم أبكي من قبل شعرت بشيء

يضم روجي إليه، طلبت من الله أن يخرج بقايا يوسف من داخلي إلى الأبد وأن لا يعلق قلبي بما ليس له نصيب فيه وأن يرسل لي من يكون عوضًا بعد كل هذا الخراب، انتهيت من الصلاة ومسكت قلبي..

'ها أنا ابدأ من جديد، ها أنا أعود للحياة مرة أخرى بعد رفضها لي عدة مرات، ها أنا أحاول مع الزمن رغم كل ما حدث، لا ادري ما الذي سوف يحدث بعد، ولكنني اثق في قدرة الله تعالى على خلق أي شيء يدفعني للاستمرار، يدفعني للبقاء! يعلم الله كم من مرة تعرضت فيها لأنهاء حياتي ولكني كنت اتراجع أملًا في كرمه، يعلم الله كم من مرة كان قلبي فيها يرتجف وطمئننته بأن الله يسمعنا، هو وحده يعلم كم الهزائم والمعارك التي اخوضها وحدي دون أن يدري بي أحد لذلك سوف يجبرني جبرًا يليق بعظمته!'

بعد أن انتهيت من صلاة الفجر جلست أدعي الله كثيرًا، ظللت أطلب منه أن يجعلني عوضًا لفريده وأن يخلق حبي في قلبها مثلما زرع حبها بقلبي، طلبت منه أن يجعلني قادرًا على بتر آلامها وخلق وردًا بدلًا منها، أن يبذل لمعة عيونها من حزن إلى فرح، وأن يجعل كل منا تعويضًا للأخر، وأن يزيل من قلبها يوسف إلى الأبد.

ارسلت لها كي أخبرها بضرورة لقائنا بعد ساعة في المكان المعتاد، كنت أأمل من الله أن يمر كل شيء كما خططت له منذ أسبوع، بعد ساعة وصلت وكانت لم تأتي بعد، اخفيت الأوراق التي معي كي لا تلاحظ شيء وبعد عشر دقائق من وصولي أتت.

_ كل ده تأخير؟

- في إيه قلقتي؟

قمتُ على الفور واخرجت قماشة سوداء واغمضت بها عينيها كي لا ترى.

_انت بتعمل ايه؟

-استني بس هتفهبي، هاتي ايدك..

اخرجت الأوراق التي كانت معي وامسكت يديها وجعلتها تمضي عليها ثم اخفيها مرة أخرى وقمت ب إزالة القماشة من على أعينها وجلست وكأن شيء لم يكن ثم ابتسمت لها قائلاً:

_ها تشربي إيه بقي؟!!

-نعم؟ ممكن أفهم كنت بتمضييني على ايه؟

_اكيد مش تنازل على ثروتك اللي مش موجودة، هتعرفني بعدين.. المهم

دلوقتي عاملة ايه؟

-نادر أنت بتعمل معايا كدا ليه؟؟

_ينفع مجاوبش دلوقتي؟

_دي تاني مرة اسألك..

-أوعدك ف التالته هجاوبك.

_طب احنا بقالنا حوالي خمس شهور نعرف بعض وأنا معرفش عنك أي

حاجة.

_بصي يا ستي أنا عندي ٢٧ سنة كنت متجوز قبل كدا ومحصلش

نصيب، بابا الله يرحمه كان رجل أعمال مشهور وبعد ما توفي خسرنا كل

حاجة وبدأت من الأول وجديد وبعد وفاة بابا انفصلت عن مراتي، وكنت قاعد

مع والدتي ومازلت ومعنديش صحاب غير محمد أنت عارفاه وبعد ما

استقرت ووقففت على رجلي من تاني بقيت عايش حياتي هنا شوية وبراشوية

وبس.

_كنت متجوز عن حب؟

-٥١-..

_طب ليه انفصلتوا؟

-مقدرتش تستحمل الظروف اللي حصلتنا بعد وفاة بابا ف مقدرناش نكمل مع بعض.

_لو قررت ترجع هتوافق؟

-لا يا فريدة هي مكانتش موجودة ف أكثر وقت أنا كنت محتاجها فيه، ف مبقاش ليها مكان خلاص

_أسفة لو كنت فكرتك بالماضي

-أنا مبزعلش من الماضي بالعكس أنا لولا اللي فات مكنتش هبقى نادر اللي أنت قاعدة معاه دلوقتي.

وجاء صوت أم كلثوم من مصدر مجهول

"وقابلتك أنت لقيتك بتغير كل حياتي معرفش أزاى حبيتك"

وأقسم أنني سمعت دقات قلبي وهي تخترق صدري ف نظرت إليها ووجدتها تنظر إليّ وعلى وجهها ابتسامة هادئة جعلت دقات قلبي تتزايد..

نظرت إليه وكنت أشعر بشيء غريب، امتلكتني الغيرة عندما قال لي إنه كان متزوج من قبل، لا أعلم لما ولكننا أصدقاء فمن الطبيعي أن أغار عليه، عندما جاء صوت أم كلثوم ونظرت إليه وجدته ينظر إليّ بطريقة مختلفة ابتسمت له كنت أشعر بشيء غريب ولكنه مميز..

'ليست أول مرة ألقاك فيها، ولكنها أول مرة يذوب قلبي بها'

(٩)

مر ثلاثة أشهر كنت على تواصل مستمر مع نادر، أصبحنا أشد قربًا، أخبرتني والدتي ليلة أمس بوصول أقارب لنا من البلد وسوف يجلسون في الشقة التي أمامنا وأخبرتني عن فتاة تدعي روان وتتقارب معي في العمر، وقالت لي أن أتقرب منها لأنها ستكون وحيدة هنا ونقضي أوقات الفراغ معًا، هي لا تعلم أن حياتي كلها فارغة وكلما أخرج يكون نادر معي ليس أكثر، علمت بوجودهم في الخارج غيرت ملابسي وخرجت كي ألقى عليهم التحية وأتعرف عليهم..

_ أنتِ روان؟

-أيوا أنا، أنتِ فريدة صح؟

_ أيوا أنا، بقولك إيه أنا مبحبش التجمعات دي تيجي ندخل أوضتي؟

-تعالِي

جلسنا في غرفتي حتي جاء الليل تحدثنا في أمور كثيرة، أخبرتني عن حياتها في البلد وإنها تمتلك موهبة الرسم وأخبرتها بموهبتي في الكتابة، اتفقنا على أنها سوف ترسم وأنا أقوم بكتابة جمل على رسوماتها، ذهبت إلى بيتها واتفقنا على المقابلة في اليوم التالي..

_ اسمي محمود مش مهم عندي كام سنة..

_ صوتك حلو جرب تغني.

_ بابا أنا عايز اقدم في مسابقة للغنى..

_ غنى إيه وكلام فارغ إيه أنت مش ناوي تكبر؟

= أهلي دائماً شافين أن أي حاجة بعملها أو عايز أعملها بتبقى تافهه،
عمرهم ما حسسوني أني ليا شخصيتي وأحلامي..

_ أنت خاين أنا مش قادرة أكمل معاك حرام عليك بقي مش ناوي
تتعديل؟!..

= أمي عمرها ما كانت سمعانا أو عمرها ما حاولت تعوض مكان أبويا
سواء معايا أو مع اخواتي، بس كانت هتعوض مكانه ازاي وهي مش عارفة تملئ
مكانها؟ طول الوقت كانت بتتخانق مع بابا لأنه بيخونها ويعرف ستات عليها.

_ أنتِ اللي مش مكفياني ولا مكفية بيتك..

أنتِ اللي نكدية ومش مدياني حقوقي ف لازم ابص برا..

_ هتفضل طول عمرك ناقص وعينك فارغة.

= كان نفسي يفهموا أن خناقتهم مكانش ينفع تبقي قدامنا، كان نفسي
يعرفوا أن احنا مينفعش نسمع الكلام اللي بيتقال منهم وقت خلافهم.

_ أتكلم عدل..

_ أسمع كلام أبوك..

_ احترم نفسك..

= ازاي وانا شافهم كدة؟ هحترم أبويا ازاي وأنا شافه أب خاين لا يحتمل
المسؤولية؟ طب ازاي هسمع كلام أمي وأنا شافها مش كاملة في عين أبويا ومع
ذلك راضية ده على نفسها ومكلمة معاه.

_ خليك انت مع صحابك ملكش دعوة بيا أنا وأبوك..

_ أنزل أقعد مع صحابك ومتوجعش دماغى..

=كنت عايز أقولهم أن مهما تكون حياتنا الخارجية كويسة وسليمة

هنكون برضه مدمرين بسبيهم.

_ أنت فاشل..

_ أنت عمرك ما كنت نافع في حاجة..

_ خليك أنت كدة ملكش لازمة ولا بتعرف تنجح ف حاجة خالص

=هما أزاى كانوا عايزين يشوفوني ناجح؟ أصلا كنت هطلع أواجه العالم

ازاى وأنا خارج من بيت مش سوي نفسيًا؟ كنت هتعامل في حياتي ازاى واحنا

في البيت مبنعرفش لغة للحوار غير بالصوت العالي وممكن كمان توصل

للضرب والأهانة.

لما كل حاجة مش عادية بتحصل في البيت اللي المفروض أكون بتعلم منه

يبقى أنا كمان كان لازم أطلع شخص مش عادي، العيب مش فيا ولا في أي حد

تاني العيب فيهم هما.

انتهت الجلسة وذهبت إلى المكان الذي أجلس فيه أنا وفريدة معًا وجلست

في انتظارها.

_ يابنتي هو أنت هتفضلي طول عمرك بتتأخري كدا؟

-كنت قاعدة مع روان.

_روان مين؟

-هحكيلك بعدين المهم كنت عايز إيه ومفاجأة إيه اللي بتقول عليها؟

-غمضي عيونك

_أهو..

-فتحي

_إيه ده؟ "الروح المبتورة" ل فريدة محمد، ده اسمي وده اسم الرواية

بتاعتي، لحظة! الكلام اللي جواد ده بتاعي، أنا مش فاهمة حاجة!
 -أنا هفهمك فاكرة لما اتقابلنا وأنا غمضتلك عيونك ومضيتك على أوراق؟
 كنت بمضيكى على عقد موافقتك على الرواية ودي أول نسخة منها وأن شاء
 الله هتنزل في معرض الكتاب وهتكسر الدنيا أنا متأكد..
 _نادر..

- لا ما هو أنا متعبتش كل ده علشان في الآخر تيجي تقوليلى نادر وتقعدي
 تعيطي أمسي دموعك دي..

_ طب أنت اخدت الرواية ازاي؟

- قلبي كان حاسس إنك مش هترضي تنشرها لما أقولك، فأخذتها عندي
 علشان انشرها لك أنا واحطك قدام الامر الواقع

_ أنت مش بس دكتور شاطر أنت كمان صاحب جدع أوي.

"أقسم لك بكل الأديان السماوية إنني أجيد الحب أيضًا"

_ قلتك من الأول أنت اللي مصدقتيش.

عدت إلى المنزل وفي يدي أول نسخة من الكتاب، قلبي كان يندفع بقوة من
 فرط السعادة التي أشعر بها، لوهلة كنت سأقوم باحتضانه.

ماذا لو دفنت نفسي بداخلك إلى الأبد؟ لا أريد حبك فالحب يفسد كل
 شيء ولكني أريد حضنك فهو سوف يصلح كل شيء، أشعر وكأنني أحق به من
 أي شخص آخر ولكن لا..
 أنا لا أحبك..

ذهبت إلى روان كي ترى روايتي كلما تذكرت إنه فعل كل هذا من أجلي
 تغمرني الفرحة وكأنها ليست من مجهودي أيضًا، ولكن فكرة إنها منه تجعل
 كل شيء مختلف..

_ ايه يا بنتي في ايه؟! _

-بصي!

_ دي رواية مين؟ _

قصصتُ عليها كل شيء منذ أول مرة رأيته فيها حين كان يحميني من مَنْ حاولوا التهجم عليّ وجمع القدر لنا مرة أخرى إلى الآن، نظرت إليّ نظرة ذات معنى ثم قالت:

_ بتحبيه؟ _

لا الأمر أكثر من الحب الأمر يشبه بالتسلل، أتدري معنى أن يتسلل شخص إليك دون أن تدري؟ هو تسلل إلى داخلي ورواني بدفته ثم بعد أن أصبحت جزءاً منه اكتشفت إنني أحبه.

_ لا طبعاً مبجهوش، أنا هروح علشان أنام أشوفك بكرة.

كنت أشعر بروحي أشد خفة من ذي قبل، منذ مدة وأنا لم أشعر بتلك السعادة، أمسكت بالهاتف كي أرسل له رسالة أشكره فيها عما فعل معي ولكن في النهاية قمت بحذف كل ما كتبت، وكتبت له شيئاً آخر وبعد ذلك أمسكت قلبي كي اشاركه لحظات فرجي مثلما كان يشاركني لحظات وجعي.

"ما رأيك أن نجعل لغة خاصة بيننا لا يتحدث بها أحد سوانا؟ ما رأيك أن تغار عليّ وأغار عليكِ وأن نقضي جميع أوقاتنا سوياً وان تأخذني بين أضلعك خلسه دون أن يتفوه الأخر بكلمة أحبك، ما رأيك أن نلتقط صورة تذكارية معاً فتلتصق بي كي تبدو أكثر جمالاً، ما رأيك أن نفعل كل الأشياء التي يفعلها العشاق ولكننا في النهاية أصدقاء ليس إلا، ما رأيك أن ألهم شفيتك تحت تأثير أي شيء ماعدا الحب؟ ما رأيك أن تكون ملكي لأنك ملكي ليس لأنني أحبك؟"

(١٠)

منذ أن غادرت وهي لن تغادر تفكيري، ابتسامتها المختلطة بدموعها عالقة في ذهني تأبى الخروج، كانت مسيطرة عليّ للحد الذي جعلني غير قادرًا على النوم من التفكير بها، جاءني رسالة منها تقول فيما:
 "مش أنا لوحدي اللي طلعت فريدة، انت كمان طلعت نادر يا نادر،
 تصبح على خير"

كيف تطلبين مني أن أصبح على خير وأنا أصبح على كل شيءٍ سواك؟
 سافر نادر منذ يومين من المفترض أن يأتي صباح الغد، كنت أشعر بالضيق لأنه بعيد عني أصبحت أشعر بالأمان في قربه أصبح أقرب لروحي من أي شخص آخر، لذلك حتى وإن كنا لم نتقابل يوميًا ولكن كان يفصلني عنه بضعة دقائق فقط، فكيف أجلس هنا بنافاذة غرفتي ويفصل بيني وبينه بلاد؟
 هاتفته كي اطمئن عليه ولكني وجدت الهاتف مغلق اعتراني القلق، بعد قليل جاءت روان وجلست معي مر ما يقارب الثلاث ساعات، تحدثنا في بضعة مواضيع مختلفة أخبرتني عن اشتراكها في مسابقة كبيرة للرسم، كانت تود أن ترسم شيئًا مختلفًا رد عليها قلبي وأخبرها بصوت لم يسمعه سواي أن ترسم نادر، فكان مختلفًا للحد الذي لا شبيه له..

عيناه الواسعتان ذات اللون العسلي يحملان بريقًا يجعل قلبي ينشق تمامًا مثل شق البرق، شعره البني الفاتح الذي يتطاير مع الهواء ف تطير روحي معه، شفتيه البارزة وابتسامته الساحرة التي تذوب بقلبي، وطول قوامه وعرضه الذي يناسب تمامًا جسدي الضئيل عند احتضانه يومًا ما، وتناسق

وزنه كل هذا يزيدده وسامة بجانب روحه التي أزدادُ تعلقًا بها يومًا بعد يوم.

_يا بنتي سمعاني؟

-ها.. اه معاكي..

_ياه ده شكل عقلك غايب مع الغايبين.

-روان قلتك مليون مرة متكلميش بالأسلوب ده أنا ونادر مش أكثر من

صحاب.

_طب عيني في عينك كدا.

-متغيريش الموضوع وقوليبي فكرتي هترسي ايه؟

_أنا اللي بغير الموضوع يا فريدة؟ على العموم لسا مش عارفة.

-بصي حاولي تشوفي حاجة مختلفة، فكرة متكونش أترسمت قبل كدا

ورسوماتك حلوة جدا ودايمًا بتبقي فيها فكرة مختلفة فأنا واثقة إنك قدها

والله.

أيعقل أن أكون قد أحببته حقًا؟ أنا لم أشعر بهذا الشعور مع يوسف من

قبل، أيعقل أن يكون نادر هو الحب الحقيقي؟ أكون هو من خلقت من

ضلعه وخلق هو ناقصًا كي أكمله أنا بوجودي؟ أكون هو بطلي الذي أخلقه

مع كل رواية؟ هل سيكون هو الفارس الحقيقي؟

لا أعتقد ذلك هذه أكاذيب ليس إلا، لا يوجد شيء إلا ويفسده الحب، لن

أعترف إنني أحببته لن أترك قلبي يقع بين يديه حتى وأن كان كل ما يحدث

بيننا يدل على وجود شيئًا ما..

في بعض الأحيان نحتاج إلى علاقات بلا مسمى حقيقي، أن نشعر سويًا

بكل شيء ونستكفي فقط بكشف مشاعرنا عن طريق الأعين، أن نقول كلمات

غزل وقت الفرح ونختبئ وراء ستار الصداقة الذي نعلق عليه جميع أفعالنا.
 أنا لا أريد أن أخسر نادر لذلك لا أريد أن أضع لعلاقتنا معاً مسمى..
 جاء منتصف الليل وهاتفه مازال مغلق، حاولت مراراً وتكراراً ولم يتغير
 شيء، لم أكن احتمل هذا القلق، تطاير النوم من عيني كما تتطاير رائحته
 حولي.

أشعر بك، أشعر وكأنك تحاوطني، أنفاسك تخترق جسدي فأشعر بملاذ
 قوي، لمسة يداك تسير على جسدي كأنك هنا حقاً، أغمض عيناى ف تتجسد
 صورتك أمامي، أفعل مثل طفل صغير وأفتح نصف عيني حتى أتأكد من
 وجودك وأشاهدك قبل أن تختفي ولكني لا أراك فأغمض عيناى مرة أخرى
 واستكمل مشاهدتك، تقترب مني أكثر تقتحم أضلعي تدخل مسكنك فإنني لا
 أرى لك مكاناً مناسباً تمكث به مثل أضلعي، لأن هذا هو مقامك اتمني منك أن
 تظهر، أن تظهر لي دائماً حتى وإن كنت خيالياً، فرائحتك التي تنبعث في الهواء
 تجعلني استنشق أماناً، فأنت تسكنني بشكل لا مثيل له.

بعد ساعة جاءني رسالة أن الهاتف الذي حاولت الاتصال به متاح الآن،
 فهاتفته على الفور، كان يبدو عليه الارهاق من نبرة صوته أو ربما شعر قلبي
 بهذا.

_ أنا أسف كنت مشغول جدا ومخدتش بالي أن التليفون فاصل..

_ لاء.. ولا يهيمك أنا بس كنت عايزة اطمئن عليك.

_ وحشتيني

"أقسم أن نبضات قلبي تسارعت وكان على وشك السماع بها"

-هترجع أمتي؟

_ بكرة بليل إن شاء الله.

_ تيجي بالسلامة.

_ اشوفك بعد بكرة؟

_ رايحة فرح مع ماما وروان فمممكن منعرفش نتقابل.

"شعرت انني تسرعت فأكملت على الفور"

_ مممكن تيجي معانا لو حابب.

_ خلاص معنديش مانع.

_ تصبح على خير

"علمتُ أن حزني يتلاشى بمجرد سماع صوتك ويتسرب الأمان مباشرة إلى قلبي بدلاً منه"

شعرت بالاطمئنان بعد أن حادثته، دخلت إلى النافذة كي أجلس بها قليلاً، فكان يبدو على الجو إنه على وشك أن يمطر، ف بالفعل لم يمض سوى القليل واذ بحبات المطر تهل عليّ، جلست كي استمتع بها وهي تتساقط على ف اغمض عيناى مستمتعة بتلك الشعور.

"تتناثر حبات المطر على وجهنا، نرقص ونتلاعب سويًا تحت الأمطار، أنظر إلى السماء وأغمض عيناى وأترك مساحة كافية للأمطار لكي تقتحم وجهي، أشعر بفرحة كبيرة تجتاح جسدي، استمع إلى همساتك وأنت تدعوا الله أن يجمعنا سويًا، فأنظر إلى عينيك وابتسم ثم أغمض عيناى مرة أخرى وأجري، تضع يدك في يدي وتقول لي "دعينا لا نكثرث لوجود شيء سوانا نحن وحببات المطر" ابتسم واشعر بفرحة هائلة حقًا، ها نحن معًا الآن نراقص ونلهو تحت أنغام المطر، كما أنى أيضًا اشعر باغتسال روحي وأحزاني وكأني

أنبت من جديد، أنبت معك! تحت المطر، نجلس على الرصيف سوياً ونطلق ضحكة ساخرة على ما نحمله من هم ليس له قيمة، فأني اكتشفت أن وجودنا معاً تحت حبات المطر أو تحت اي ظرف يجعل كل شيء ليس له قيمة، نسماث الهواء التي تقتحم رنتاي تجعلني استنشق هواء نقي مثل حبك تماماً، تزداد حبات المطر وتتكاثر مثل ازدياد حبي لك، ثم بعد وهلة يقل معيار المطر مثلما تقل نسبة بعدي عنك مع مرور الوقت، أرجو منك أن تكون معي تحت حبات المطر وتحت حبات الوجع وتحت كل شيء، فقط كون معي، كون لي"

_فريدة يا فريدة قومي يا بنتي..

_إيه يا ماما في إيه؟

_إيه اللي منيمك في البلكونة في الجو ده؟

_مش عارفة أنا كنت مش عارفة أنام ودخلت اتفرج على المطر والظاهر أن راح عليا نوم.

_طب قومي يا بنتي أحسن يجيلك برد ولا حاجة..

_هي الساعة بقت كام؟

_الساعة عشرة ونص.

_لا خلاص أنا صحيت.

_طب ما تدخلني تعمليلنا اتنين قهوة وتيجي نقعد في البلكونة شوية.

_عيوني يا ست الكل.

ذهبت لإعداد القهوة، كنت أشعر بالنشاط، وكلما تذكرت الحلم الذي حلمتُ به ليلة أمس ازدادُ نشاطاً وبهجة أكثر، انتهيت من اعداد القهوة

وذهبت بهم إلى النافذة ووجدتُ أمي جالسة في انتظاري وتقرأ أخبار اليوم في الصحيفة.

_ يا خبر دي حاجة تقطع القلب.

في إيه يا حبيبتي؟

_ شاب زي القمر مات بسبب الزفت اللي بيشرهه اليومين دول بيقولوا إنه ابن رجل أعمال كبير وتوفي بسبب جرعة زيادة.

_ أنتِ عارفة يا أمي أن الحاجات دي بقت كتيرة أوي اليومين دول! ده في كمان أنواع بتخليكي مش حاسة بجسمك تمامًا، ولا بتحسي باللي حوالكي أصلاً.

_ اللهم أحفظنا يارب.

_ طب تعرفي أيام لما كنت بحضر الجلسات مع نادر كان في راجل عنده حوالي ٤٥ سنة كان اسمه هادي تقريبًا، المهم يا أمي أن الراجل ده كان خريج هندسة يعني مهندس محترم بعد ما اتخرج مكانش لاقى شغل نهائي كان شاب عادي من عيلة متوسطة ناس على قد حالهم، كان كل ما يروح يقدم في شركة كانوا ياخدوا أصحاب المناصب الكبرى واللي أهلهم جايينلهم وسطى وهكذا بالرغم من إنه كان دايمًا بيطلع الأول على دفعته وبتخرج بامتياز مع مرتبة الشرف، المهم أهله كان معاهم مبلغ صغير فأتجوز بيه وربنا كرمه واشتغل في شركة وقعد فيها سنة بالظبط وبعدين ابن المدير طرده لأسباب هو نفسه ميعرفهاش، نزل اشتغل على قهوة علشان يصرف على مراته وابنه بس المصاريف مكانتش بتكفي خصوصًا أن ابنه ابتدى يكبر راح اشتغل على توك توك بتاع واحد من اللي بيقعدوا على القهوة فطبعاً بحكم شغله في مجال زي

ده اتلم على ناس مش كويسة لحد ما فضلوا وراه والموضوع بدأ بسيجارة لحد ما بقى مدمن هيروين وما شبه ذلك، كان في أوقات مببقاش معاه فلوس يشتري ف مكانش بيبقى في وعيه وكان بيفضل يكسر في كل حاجة في الشقة لدرجة إنه في مرة كان هيبيع ابنه علشان عايز فلوس يشتري القرف ده ف بالتالي مراته أخذت الولد وسابت البيت ولحد دلوقتي بالرغم من إنه اتعالج بس مش عارف يوصلهم وميعرفش عنهم حاجة، كان بيحكي ويقول إنه في الفترة الأخيرة مكانش فيه صحة إنه يشتغل ف باع كل حاجة عشان يشتري بيها وبعدين مبقاش معاه فلوس ولا حاجة يبيعتها ف كان بيحرق الصراصير والنمل وبعدين يشمهم! تفتكري يا أمي مين السبب في الحالات دي احنا ولا الدولة! تفتكري لو كان ابن المدير سابه في الشركة بيشتغل كان هيوصل للمرحلة دي؟

_ياهارى يا فريدة الواحد مبقاش عارف العيب فين في الدولة اللي مش موفرة فرص عمل لهم ولا فينا احنا اللي بنمشي ورا أي حد؟ احنا حقيقي بقينا في زمن العجايب ولاد الأكاير معاهم فلوس ووقتهم فاضي ف يبشربوا علشان يتسلوا، والفقير اللي مش لاقى ياكل أهو ببشرب من غلبه، ربنا يرحمنا يا بنتي..

_طب ما بقولك إيه ما تسيبك من الفقير وابن الأكاير وتيجي أقولك حاجة..

_خير في إيه؟

_نادر.....

_ماله..؟ سكتي ليه...؟

_قلته يجي معانا الفرح بتاع بكرة.
_ايوا يا فريدة هو ده الكلام اللي بيتقال على الصبح مش صراصير ونمل
وحاجات غريبة
_طب أعملي حسابك عايزة منك فلوس علشان أنزل أجيب فستان مع
روان علشان معنديش حاجة ألبسها واروح بيها بكرة..
_طب نرجع بقي للصراصير والنمل تاني علشان دي مشاكل دولة
والأفراح اساساً حرام.
ضحكت على طريقتهما، ف أمي هي الشخص الوحيد الذي بإمكانك
التحدث معه في كل الأشياء وفي عدة مواضيع مختلفة في آن واحد، هي
الوحيدة التي بإمكانها أن تضحك وتبكي وتصرخ وبعد قليل تجلس وكأن شيئاً
لم يكن.

(١١)

_ تحفة يا فريدة تحفة..

_ مش قصير شوية؟

_ لا بصي أنتِ هتاخديه يعني هتاخديه ده كأنه معمول ليكي بالظبط أنتِ

عبيطة؟

_ لا.. لا وبعدين الجو ساقعة يا ستي...

_ فريدة الموضوع انتهى اتفضلي أدخلي غيري هدومك، وهناخد ده لو

سمحت.

"انتهينا من شراء الأشياء وزهبننا كي نجلس قليلاً فمند ما يقارب الخمس ساعات ونحن نتجول في الخارج".

_ ياالله رجلي مش حاسة بيها أطلبيلي حاجة اشربها بسرعة.

_ لا أطلبلي أنتِ وأنا هقوم أكلم نادر أشوفه هيركب الطائرة أمتي..

_ مستعجلة عليه كدا ليه كلها بكرة وتشوفيه..

_ طب والله يا روان لو مبطلتيش طريقتك دي هخليكي أنتِ اللي تحاسبي

على المشاريب.

_ لا يا ست وعلي إيه قومي كلميه ولو عايزة تكلميه من تليفوني كمان

خدي كلميه.

_ أهو مبيردش .

_ أحسن..

_بتقولي حاجة؟

_لا بقول المانجا دي طعمها حلو اوي اوي..

_أنا مبهموش على فكرة هو بس جدع معايا اوي كفايا إنه وقف معايا
وخرجني من اللي كنت فيه وحققلي حلبي وروايتي هتنزل في المعرض بسببه.

_أيوا أيوا عارفة كل ده وإنه مجرد أخ وصاحب بالنسبالك وإني لو قلت
كده تاني هتزعلي مني ومش هتحمي معايا وكل ده.

_هو أنا بحبه؟

_لاء.. بقولك إيه أنتِ شكلك مجنونة وهتجنيني معاكي، بس أقولك
متشوقة أوي أني أشوفه بكرة.

_مممكن مييجيش.

_هيجي وهتقولي روان قالت.

_طب يالآ علشان نروح أنا تعبت.

_أنتِ نايمة؟

_أه رجعت من برا تعبانة فنمت؟

....

_أنتِ كويس؟

"تتسألين عن حالي قبل سماع صوتك أم بعد؟ فإذا كان يعنك الأمر ف
اشتياقي لك يقتلني ولم أكن اشعر أنني بخير إطلاقاً، أما بعد فماذا تضعين

على قلبي من سحرٍ تجعليه ينسى كل شيء أمام كلمة منك؟"

_أيوا أنا كويس، أنا بس حبيت أكلمك أقولك أني وصلت.

_هشوفك بكرة؟

_إيه عندكوا عربية ينفع تروحوا بيها الفرح غير عربيتي ولا إيه؟

"كل شيء يسكن حولي ماعدا صوت ضحكها"

_ضحكتك طلعت حلوة أوي..

_ده من زمان على فكرة، يالآ تصبح على خير ومتتأخرش بكرة..

_فريدة يا حبيتي أنا صاحبك مش السواق بتاعك.

_أنت تطول!

"لا، أودك فقط أن تعلمي إنني أتمني أن أكون بجانبك حتى وإن كنتُ

حارسا لبيتك، ف يكفيني ضمان رؤيتك مرتين على الأقل يومياً"

_أه وهطول القمر قريب كمان لو مش عاجبك.

_لاء خلاص عاجبني يالآ سلام.

"يا لك من حمقاء هل كان يجب أن أضع اسمك كي تفهني ما أقصده؟

ماذا سوف يحدث لو فهمتي أن ما أقصده بكلمة قمر عائدة عليك أنت؟

عائدة على فريدة ليست على شيء سواها، فإن كنا نريد أن نستعير للأشياء

الجميلة اسم غير اسمها ف بإمكاننا أن نستعير اسمك، فهو يحمل كل

جميل، يكفي إنه يحملك".

_يا فريدة يالآ ده مش فرحك

_يا نادر نازلة، ماما نزلتلك؟

_أه وروان نزلت هي كمان.

_طيب دقيقة أهو..

" لا أحب الانتظار ولكني أحبها، بدأت أشعر بالغضب نتيجة لتأخيرها

منذ ساعة أو أكثر وأنا على تلك الحال وفي كل مرة تقول لي باقي لي دقيقة

واحدة لما مستعجل هكذا؟ أرسلت روان إليها لأنها لم تجب على اتصالي الأخير
وكانت على وشك الذهاب ولكن أتت فريدة أخيراً..

_ خلاص فريدة نزلت أهي..

"نظرت إليها واضطربت مشاعري كنت أشعر بمزيج من الغضب
والاندهاش، كنت غاضباً من قصر ما ترديه لا أود أن يرى أحد جمالها غيري،
وكنت مندهشاً من فرط جمالها، كانت رائعة وكأن جمالها مرسوم بدقة، كانت
تشبه الأميرات حتى وإن لم يكن ف يكفي إنها تشبه الأميرة الخاصة بي، يكفي
إنها أميرتي!

كانت ترتدي فستاناً أسود اللون يصل إلى ركبتها، وشعرها الحريري
المنسدل وراء ظهرها ويتطاير مع نسيمات الهواء، لم تكن تضع مساحيق
تجميل فلم تحتاج إليهم، عيناها الخضراء يزيدونها براءة ووسامة، كانت تضع
أحمر شفاة فقط فزاد جمالها جمالاً، كانت شفتاها تشبه للكرز وكم كنت
مشتاقاً لأكل الكرز!

_ بقالك خمس دقائق باصصلي، شكلي وحش؟

_ أنتِ تسكتي خالص إيه الفستان القصير ده؟؟

_ روان هي اللي... وأنت مالك اصلاً؟ وبعدين أنا رايحة فرح ف عادي يعني..

_ الفرح اللي أنتِ فرحانة إنك رايجاه ده لو شفتك اتحركتي من مكانك

هقتلك، اتفضلي أركبي

_ أنا غلطانة أني قلتلك تعالي معانا..

_ بتقولي حاجة؟

_ بقول يالآ اتأخرنا..

"جلست بجانبه وجلست روان بجانب أمي في الخلف على الرغم من الغضب الظاهر عليه، إلا أن ملامحه كانت تبسّم لي من حين لآخر، بعد نصف ساعة وصلنا، سرّت بجانب روان وأمسكت يديها كنت أعتقد أنني بتلك الطريقة سوف أمنعه من المشاجرة معي بسبب ما ارتديه.

_بس قوليلي إيه القمر ده؟

_قمر إيه أنتِ تسكتي خالص أهو اتزعقلي بسببك وأنا أصلاً قلتك من الأول إنه قصير وأنتِ اللي صممتي إني أجيبه.

_إيه ده هو غيران؟

_بقول أسكتي.

_طب والله غيران.

"دخلنا إلى القاعة جميعاً، جلسنا على طاولة في مكانٍ مناسب تجعلنا نرى العروسين من مكاننا دون أن نذهب إليهم، دق قلبي عندما رأيتهن، نظرت إلى نادر على الفور ولا أعلم لم فعلت هذا ولكني وجدته ينظر إليّ أيضاً ولكن نظراته كانت مختلفة، كانت رائعة!!

لم يجعلني اتحرك مثلما قال، أخذت امي روان وقاموا كي يذهبوا إلى الحمام، كنت سأبقى معه وحدي، نظرت إلى روان كي لا تذهب مع أمي ولكنها ضحكت وذهبت ونظرت إلى أمي نظرة لم أفهم معناها، وكأنهم يقصدون أن يتركوني معه وحدي.

_مممكن بقي أفهم لو مكنتش جيت معاكوا كنتِ هتعملي إيه؟

_هعمل إيه يعني مش فاهمة؟

_نعم؟ وأنتِ مفكرة أني كنت هسيبك تمشي من غيري بمنظرك ده؟

_إيه ماله منظري، زي القمر صح؟
 _فريدة متهزريش.
 _في إيه يا نادر مالك! أول مرة تتكلم على لبسي بالأسلوب ده، أول مرة
 تتكلم أصلاً!
 _يمكن علشان...
 "قاطع مراد حديثه فجاءة"
 _فريدة وحشتيني، مختفية فين يا بنتي؟!
 _أهو موجودة عامل إيه واختك عاملة إيه وحشتني أوي.
 _كويسين كلنا بخير الحمدلله.
 "نظر إليّ نادر الذي كان يستشيط غضباً فقلت مسرعة كي أهدئ من
 الموقف قليلاً
 _نسيت أعرفكم ببعض دكتور نادر، والمهندس مراد قربنا من بعيد.
 _أهلاً وسهلاً
 "حمدتُ الله كثيراً أن أمي قد جاءت هي وروان، جلس مراد معنا بناءً على
 رغبة أمي، اقتربتُ إلى نادر قليلاً وقلت له بصوت منخفض حتى لا يسمعنا
 أحد:
 _أول مرة أعرّف إنك بتغير كدة..
 _أنا؟ خالص على فكرة مين أنتِ علشان أغير عليكي؟!
 _أيوا ما هو واضح.
 جاء دور رقصة السلو ووجدتُ مراد ينظر لي ويقول:
 _فريدة إيه رأيك تيجي نرقص سوا؟ نفسي أرقص سلو من زمان ومش

لاقي اللي يشاركني اللحظة دي..

"قاطع نادر بعصبية قائلًا"

_بعتر بس الفرح مليون بنات تقدر ترقص مع أي واحدة فيهم، أصل فريدة هترقص معايا أنا عن أذنكم.

ثم سحبتني من يدي بسرعة دون أن يتلقى مني أي جواب حتى، شعرت بالصدمة من رد فعله، لم أنكر أنني كنت سأوافق على طلب مراد لأنني كنت أرغب في الرقص، ولكني الآن سوف أرقص مع نادر.

أعلم أن لا يوجد اختلاف وفي النهاية كنت سأرقص سواء مع نادر أو مراد ولكن الاختلاف الآن يكمن في قلبي، ف المختلف هنا إنه نادر وليس شخص آخر!

أهتز جسدي بأكمله عندما وضع نادر يده على خصري، شعرت بسخونة كل ما هو حولي عندما اقتربت مني أنفاسه، كنت أشعر إنها تخترق جسدي وترتطم بقلبي أرضًا من شدة لهيبها، كنت أشعر بارتجاف قلبي أقسم إنه يشعر بارتجاف جسدي بين يديه، لم أقوى على النظر إلى عينيه، فيكفي نظرة عيناه لي فقد جعلتني لم أقدر على التنفس فماذا لو كانت تقابلت عينايا مع عيناه؟ أقسم إنني في تلك الحالة كنت سأسقط منه أرضًا، حُركت كل مشاعري وظلت تتلاعب بي عندما مال بجسده على جسدي، وقتها تقابلت أعيننا كم مكثنا في هذا الوضع لم أعلم، ولا أود أن أعلم، كل ما أعلمه أن العالم كله سقط مع سقوطنا سويًا، ولكنه وقع في الهوية وارتفعت أنا إلى القمة"

انتهت الرقصة، كيف لأشياء نقاوم طوال الوقت من أجل اخفائها وتأتي رقصة كهذه تطوح بي وبكبريائي أرضاً؟

أهي بسبب المسافات التي كانت شبهه منعذمة اليوم؟ فهذه هي المرة الأولى التي أكون فيها بالقرب من نادر بتلك الدرجة..

كيف بنظرة أن تفضح ما نبات طيلة الليل نخفيه؟

لم أتحدث معه طوال الفرح، جلست بجانب روان ولم اتفوه بكلمة واحدة، كنت أشعر بالتوتر، بالخجل، بالغضب من اقترابه مني بتلك الدرجة، بالحب!

ظل ينظر إليّ وهو يبتسم، وكأنه فاز بجائزة بات عمره كله يحلم بها، وكأنه يشعر بالانتصار!

في عودتنا إلى المنزل جلست أنا بجانب روان في الخلف وطلبت من أمي أن تجلس هي بجواره، نظر إليّ وابتسم وكأنه كان يتوقع إنني سوف أفعل هذا، جلست بجانب روان اتحامي فيها من كثرة أفكارني التي ستقضي عليّ، كان ينظر إلى في المرأة الأمامية، كلما نظرت إليها وجدته ينظر إليّ وابتسم أكثر. هربت من نظراته ولكني لم أقدر أن أهرب من تفكيري.

فكيف لي أن أقف عن التفكير به وهو لم يتوقف عن العتب في قلبي؟ عدنا إلى المنزل واصرت أمي أن يصعد معنا إلى أعلي، كانت الساعة العاشرة مساءً وقال إنه يجب أن يعود إلى منزله كي ينام مبكراً لأنه يرتبط بعدة مواعيد في الصباح، رفضت أمي كل المبررات وفي النهاية صعد معنا إلى أعلى، طلبت من روان أن تظل معي حتى يذهب هو وفي وقتها يمكنها الرحيل حيثما شاءت، جلست بجانبها وجلس هو أمامي بجانب أمي، كنت أشاهد أنا

وروان بعض الصور التي التقطناها سوياً والتي التقطتها لنا روان على غفلة، وكان هو يتحدث مع أمي بلهفة شديدة من الطرفين.

_بس بس لقيتها

"نظرنا جميعاً إلى روان التي صاحت بكلماتها وهي تنظر في الهاتف ويعلو على وجهها علامات الفرح والسرور"

_هي إيه دي اللي لقيتها؟

_ مش مهم المهم إني لقيتها.. لقيتها يا فريدة.

_ خدي هنا رايحة فين؟

_ هاجيلك بكرة.

_ طب هاتي التليفون أشوف باقي الصور وهجيبهولك تاني.

_ بكرة يا فريدة بكرة.

"قالت آخر كلماتها وهي تجري في إتجاه الباب دون أن تودع أحد أو تلقي السلام على نادر حتى، ضحك كل من نادر وأمي على تصرف روان الغريب ولكني لم أضحك معهم، فكلما تذكرت ما حدث في الفرح يحمر وجهي وأشعر بالخجل منه.

أود أن أقوم كي أصفعه على ما فعل وبعد ذلك أقوم باحتضانه على ما فعل أيضاً.

تناول نادر معنا العشاء ثم غادر، أمسكت امي يدي ونظرت إلى عيني وقالت:

_بيحبك على فكرة..

_أيوا ما طبيعي يا أمي مش احنا صحاب؟ وبعدين أنا كمان بحبه..

_ فريدة أنا مهززش نادر بيحبك..

_ أمي لو سمحت مش حابة أتكلم في الموضوع ده.

_ يابنتي صوابك مش زي بعضها مش معنى إنك دخلتي في علاقة ومكملتيش يبقي كل الناس وحشة، وبعدين ما هو كمان كان متجوز قبل كدة ومنجش في حياته ده معناه إنه فاشل؟ بالعكس ده يعلمكم إنكم متكرروش نفس أخطاء الماضي واعتقد أن أنتوا الأثنين أتعلمتوا كثير من علاقتكم اللي فاتت، قتلتك مرة وهقولك تاني أن العلاقة اللي هتدخلها بعد ما تكوني مريتي بعلاقة قبل كدة بتكوني أنجح فيها، لأنك بتكوني نضجتي بالشكل الكافي بأنك تحافظي عليها ومتقعيش في نفس الاخطاء اللي وقعتي فيها قبل كدة، وبعدين ربنا أهو الحمدلله عوضك ب روان وبقت رزق ليكي وظهر وسند وأكثر من اختك كمان، مش هقولك أن الأوان تتجوزي وأشوفك بالفستان وأشوف عيالك قبل ما أموت والكلام ده، بس هقولك أن الأوان أشوفك مرتاحة يا فريدة، مش هتعيشي طول عمرك بتصارعني نفسك وتجري ورا قلبك ومشاعرك، أقفي شوية خدي نفسك خلي قلبك ياخذ قرار ولو لمرة واحدة وصدقيني مش هتندمي..

_ ماما أنا تعبانة وعايزة أنام ممكن كفاية كلام لحد كدة؟

_ هتفضلتي طول عمرك جبانة وخايفة تواجهي مشاعرك؟ هتفضلتي

تهربي لحد أمتي يا فريدة؟

_ بصي أنا هدخل أنام دلوقتي والصبح هجاوبك على كل اللي أنت عايزة

تعرفيه..

_ لو جرالي حاجة هيبقي بسببك والله.

_ بعد الشر عليك يا ست الكل، يالآ تصبحي على خير

(١٢)

مر أسبوع على آخر مرة رأيت فيها نادر، لم ألتقي بـ روان كثيرًا في الفترة الماضية فقد كانت منشغلة بتحضير رسمتها للمسابقة التي اشتركت فيها سابقًا، كنت أشعر بملل حتي هاتفني نادر وقال لي ما رأيك أن نذهب للخارج اليوم؟ لم أعترض فكنت بحاجة إلى رؤيته.

_ مفيش مرة الاقيكي بتقوليلي تعالى نزل سوا شوية؟ ولا أنت مش بتحتاجيني غير في المشاوير وبس؟

_ بص يا نادر هفهمك حاجة أنا لو اتصلت وقلتلك تعالى نخرج يبقي أنا كدة اللي عزمك وأنا مش هصرف عليك بصراحة..

_ لاء اقنعتيني ونعمة الصحاب يا بنتي والله..

_ عيب عليك، يالآ أطلبلي قهوة علشان مصدعة ومش فايقالك بصراحة.

_ أنت كويسة؟

_ أيوا في إيه؟

_ لا عادي بسأل..

_ طب قولي هتسافر تاني أمتي؟

_ أقوم أمشي من دلوقتي؟

_ لاء أستني لما تحاسب على القهوة الأول وتوصلني وبعدين أعمل اللي أنت

عايزه.

_ مادية أوي، على العموم مش عارف بس احتمال مسافرش أو لو

سافرت هتبقى بعد فترة مش دلوقتي.

_ يا لأ أحسن علشان مش هلاقي حد يخرجني وأنت مش موجود.

_ ليه فين روان؟

_ مشغولة اليومين دول عندها مسابقة للرسم ولو فازت هتعرض في معرض للرسومات وهتبقى فرصة كويسة ليها وتقدر من بعدها تفتح معرض مستقل بيها وبرسوماتها.

_ ربنا معاها.

_ أعمل حسابك إنك هتخضر المعرض لو هي فازت علشان عايزاك تكون موجود معنا واحنا بنشوف الرسمة بتاعتها خصوصا إنها مورتهاش لحد ولا قالت هي عن إيه..

_ اشمعنا؟

_ معرفش والله بس هي قالتلي أعرفك.

_ خلاص تمام..

"اشتاق لك يا أبي أكثر من أي وقت مضى، أني على يقين تام لو إنك مازلت حيًا حتى الآن كنت ستنشلي من كل هذا، من الأفكار التي تصارعني، من الطريق الغامض الذي ينتظرنني، من الماضي الذي يلحق بي، كنت سترشدني إلى الطريق الصحيح وتقول لي أي قرار يجب أن أتخذه وكنت ستقف جوارني وتحميني من نفسي، كنت سأضع كفي الصغير بين يديك لأشعر كم هو ضئيل بجانبك فأطمئن وأذهب إلى النوم فمند رحيلك وأنا لا أستطيع النوم، لم أعر على كف أشعر بجانبه بصغر كفي فأطمئن إنه يمكنه حمايتي.

مند سقوطك يا أبي وأنا كفي فارغ ولا يوجد من يملأه.

جاء نادر ووضع كفي بين يديه ولكنني لم أقوى على أن أنظر إليه لأري هل كفي مضموم بداخله أم لا؟ فماذا لو نظرت ووجدت أن كفه لم يسع كفي؟ ماذا سوف أفعل حينها؟

تركت كفي بين يديك دون أن أنظر اليه، تنازلت لمشاعري عن الأمر بدلا من عيني

جاءت روان فجاءة فانتفضت لها في فزعة..

_ خضتيني..

_ موحشتنيش خالص على فكرة..

_ طب بس علشان مبكلمكيش..

_ ليه بس كده.. أنا زي صاحبك حتى..

_ ما علشان زي صحبتي برضه زعلانه منك.

_ طب اصالحك ازاي والله كنت مشغولة وكان غضب عني.

_ هكلمك في حالة واحدة بس.

_ إيه هي؟

_ إنك تكوني بعد كل الغياب ده خلصتي الرسمة خلاص..

_ وقدمتها كمان..

_ نعم؟ من غير ما أشوفها؟

_ هتشوفها والله أنا بس عايزة أعملها لك مفاجأة.

_ ماشي لما نشوف آخرتها.

_ طب قوليلي بقي بما أن صاحبك دكتور نفساني ويقولوا عليه بي فهم

مممكن تسألويه وتخليه يوضحلي ازاي حد يبقى مقتنع اقتناع تام أن أهله مثلا

أو أي حد في حياته ميت مع أنه عايش عادي جدا وبالرغم كمان أنه معندوش أي خلل في المخ أو هلاوس ولا حاجة.

_عادي..

_عادي إيه هو إيه اللي عادي؟

_ايوا والله عادي، الموت مش بس معناه أن جسمك يفارق الحياة وتدفني وخلص الموضوع انتهى على كدة، بالعكس يا بنتي في ناس بتموت في اليوم بدل المرة ألف مرة وفي ناس بتموت قبل ما تتولد كمان، الموت أنواع.

_أزاي؟

_يعني مثلاً إن حلمك يضيع أو إنك تبقي عايشة من غير هدف ولا طموح زي إن حد ينزل من نظرك أو يأذيكي فيموت في عينك أو إن حد يبقي موجود ومش موجود في نفس الوقت اللي هو وجوده زي عدمه كدة زي ما بيقولوا، وحاجات تانية كتير جدا ويببقوا كلهم زي الموت مبنحسش بهم ولا بوجودهم ولا بنبقى حاسين بأي مشاعر تجاه الأشخاص دي أو تجاه الحياة ولا بنبقى حاسين بأي حاجة أصلاً، بل بالعكس الناس اللي بتموت في الحقيقة ممكن نفتكرهم بحاجة حلوة ونقرأ على روحهم الفاتحة مثلاً، إنما دول بنعتبرهم متولدوش أصلاً!

أنا ممكن أموتك بالنسبالي وأنتي لسا عايشة بس ده بيبقى نتيجة لأنك أذيتيني مثلاً، وجودك دايمًا بيضرني أو ملهوش لازمة أصلاً في حياتي فأنا بنهي دورك هنا، تعرفي أن في ناس بتموت آلاف الناس في خيالها أو في دايرة حياتها والناس دول لا يعلموا عن الأمر شيء!

زي مثلاً أن ولد يحس أن باباه دائماً غائب عنه ومش قايم بواجباته تماماً
فيروح يقوله "أنت محسستي أني يتيم رغم إنك لسا عايش".

لما شخص يبقى وجوده زي عدمه يبقى ساعته مات بالنسبة لينا أحنا
كبشر بس لما ربنا يأذن ويعلم عن انسحاب روحه ويدفن تحت الأرض يبقى
وقتها مات في عينيكوا كدولة.

_ ايه الكلام الثقيل ده! الظاهر أن مش نادر لوحده اللي طلع بي فهمهم!!!

_ تصدق أنا غلطانة إني بتكلم معاكي؟ قومي أمشي بقى.

_ طيب قبل ما أمشي متنسش تعرفي نادر أن الأسبوع الجاي هنروح

المعرض علشان نشوف مين هيكسب..

_ مفيش حاجة اسمها مين هيكسب!!!

_ مش فاهمة!!

_ يعني الأسبوع الجاي كلنا هنروح علشان نشوف روان وهي بتكسب..

_ طيب ما أحنا ممكن نشوف روان وهي بتحضن فريدة دلوقتي..

_ أنا بحبك أوي يا روان أنت أحسن حاجة ممكن ربنا يكون عوضني بيها..

_ طب ونادر؟

_ أقولك حاجة بس بجد المرة دي؟ أنا حاسة أني بغرق يا روان..

_ أقولك أنا بقي حاجة؟ أنت غرقتي خلاص يا فريدة..

_ أنا خايفة..

_ نادر ميتخافش منه صدقيني اللي زي نادر ده يتحب وأنت مغمضة.

_ لأزم يجي وقت وأفتح، وخايفة من اللي هشوفه وقتها.

_ هتشوفي نفسك وأنت في حضنه، متخليش خوفك من الماضي يخسرك

المستقبل، أرمي كل حاجة بين ايديه وهو كفه هيكفيكي صدقيني..
 عم الصمت علينا ف ضمتني روان إليها وظلت تتلاعب بأصابعها بين
 خصلات شعري المبعثرة، أغمضت عيني وتركت العنان لروحي وشكرت الله
 كثيرا على أنه عوضني بها، دائما أراها تقول لي "أراك تعويضًا من الله على كل
 مكروه حدث لي أشكر الله كثيرا على أنه رزقني بك" ولكن ما أخفيه عنك هو
 أنك أنتِ رزقي وليس العكس، أنكِ أنتِ عوضي من الله عز وجل، أنني أنا من
 يجب عليها أن تحمد الله عليكِ ليس أنتِ، من دونك كنت تائهة ليس لدي
 مأوى أو صديق أميل عليه في العسر كما يقولون، ولكن عندما جمعنا القدر
 كل شيء أصبح مختلف، وكأن حقًا جاء كل منا ليعوض الآخر عن شيء ما،
 حتي أصبحنا نكتمل ببعض، عندما يغيب شخص عن الآخر يشعر بالنقص،
 لذلك أنكِ أكبر من كونك صديقة فيمكن قول أنكِ وطن، ولكن وطن لي
 فقط..

أرسلت إلى نادر كي أذكره بموعد اليوم في المعرض، وأكدت عليه الحضور
 مبكرًا، كنت مشغولة في محاولات لاطمئنان روان بأنها ستكون هي الفائزة بينما
 هي كانت منشغلة بمظهرها التي ستبدو عليه اليوم، ضحكت في سري على أنني
 لازلت أحمل هم الأشياء بطريقة أكثر من اللازم حتى مع الأشخاص المقربين
 إلي..

أنا أحب روان لذا أريد دائمًا أن أراها سعيدة..
 وصلنا إلى المعرض وكان نادر في انتظارنا، دخلنا أنا وهو وروان وجلسنا
 منتظرين النتيجة عن من سيكون الفائز، بعد نصف ساعة من التوتر والقلق
 استوقنا صوت أحدهم وهو يعلن عن أن روان هي الفائزة، قمت باحتضانها

وبعد ذلك تقدمت هي كي تستلم لوحها التي كانت رائعة للكل عدا أنا ونادر..
أخبرتني روان من قبل إنها تود أن تفعل مفاجأة خاصة لفريدة لذا قررت
أن تقوم برسمها وقالت لي ألا أخبر فريدة بشيء، ولكن ما حدث كان عكس ما
قالته تمامًا، فقد قامت روان برسبي أنا وفريدة عندما كنا نرقص في الفرح
الخاص بأقارب فريدة، كانت الرسمة مرسومة بدقة شديدة وكأنها ليست
رسمة قط، فقد قامت رسمها بطريقة حرفية للغاية، فقد ألتقطت لنا صورة
عندما كنت أميل بجسدي على فريدة ويدي ملفوفة حول خصرها وشعرها
مبعثر ويدها ممسكة بقربتي وأعيننا في أعين بعض وقامت برسمها، كانت
الصورة تدل على أننا عشاق ولا يوجد شك من ذلك..

قمت أنا وفريدة التي ظهرت عليها علامات الدهشة مثلي تمامًا، كنت
أشعر بشعور غريب، خفق قلبي فور رؤية الرسمة وتذكر فريدة وهي بين
أضلعي، لم أستطع منع نفسي ووجدتني أقول بصوتٍ مسموع..

"كل السقوط يطوح بي أرضًا إلا السقوط معك يرفع بي إلى السماء".

في نفس اللحظة التي تفوهت فيها فريدة بشيء جعل قلبي يخفق بشدة
ونظر كل منا إلى الآخر بذهول نتيجة لما سمعه..

سارت قشعريرة في جسدي عندما تذكرت اللحظة التي كنا نرقص فيها أنا
ونادر ثم مال بجسده عليّ بنفس الطريقة التي رسمتها روان، كانت مفاجأة
قوية بالنسبة لي لم أشعر بنفسني وأنا أقول بصوت عال..

"كل الأماكن التي أسقط فيها تتسبب في كسر جزء ما بداخلي إلا
السقوط بين يديك"

كل الأشياء تصبح مختلفة عندما تبدو بصورة واضحة، تبدو مخيفة في بعض الأحيان، وتبدو قابلة للفقدان في وقتٍ آخر ربما تبدو قابلة للرحيل. لا شيء يجعل قلبي يتألم حقًا سوى تفكيري المفرط في كل شيء، تفكيري في أن سيأتي يوم ولن يصبح نادر معي، أعلم أن كل الأشياء قابلة للرحيل ولكن ماذا سوف يحدث لو رحلنا معًا؟ إلى دنيا ليست فانية.. أعلم إنه يحبني كل شيء يفعله يدل على ذلك، أنا أيضًا لم أنكر إنني أشعر بالحب تجاهه ولكني خوفي من فقدانه أكبر بكثير من حبي له.. هو لم يكن لديه علم بأي شعور أحمله بداخلي له، ولكن ربما بعد الذي حدث في المعرض يجعله يفكر في الذي أخاف أن يفكر به، لا أعلم كيف حدث ما حدث، ولكننا تحدثنا في نفس اللحظة وكل منا سمع الذي قاله الآخر، نظرت لي حينها نظرة تحمل الكثير من المعاني، ولكنه لم يتحدث، شعرت بالتوتر واحمرت وجنتي، وشعر هو بذلك فقرر أن يتعامل وكأن شيء لم يكن، لم يتحدث ولم يعلق على كلامي بشيء، ولكنه كان يبدو إنه سعيدًا، فهذا من توتري قليلًا، ولكن هذا لا يمنع أن كلما أتذكر إنه لم يعلق على ما قلته يخفت قلبي قليلًا..

ففي بعض المواقف نحتاج إلى تجاهل مزين بقليل من الاهتمام.

(١٣)

أجلس في مكانٍ غريب، لا أعلم ما هو، لا أشعر بشيء، ولكنني أشعر بتكوني، ها أنا أنمو بداخل هذا المكان، لا يوجد أحد سواي، أري شريطاً يمر أمامي، أري فيه أشياءً غريبه لا أعلم ما هي، أوجاع، فساد، ظلم، هلاك، عالم آخر غير الذي أتواجد به الآن، هذا الشيء الذي يمر أمامي يقلقني، ها أنا أنمو بشكل أسرع، الأيام هنا تمر ببطء ولكني لا أريد أن أخرج، لا أعلم ما الذي سوف يحدث بعد ذلك، ولكنني أشعر براحه هنا على الرغم من أنني وحيد، لا يوجد وجع هنا، لا يوجد شيء يؤذي، لا يوجد أي مخاطر، ولكنني مهلاً أنني أنمو بشكل مبالغ فيه، المكان هنا يضيق عليّ، لا أستطيع التحرك، بعد فترة ليست كبيرة شعرت بأشياء غريبة حقاً، كما أنني أيضاً أشعر بأيد تتجه نحوي، لا أعلم أهي يد نجاة أم هلاك؟ لا أعلم شيء سوى أن هذا المكان كان يحميني وأصبح يضيق عليّ، هل من الممكن إنه ليس مكاني منذ البداية؟ لا يمكنني الاستيعاب كما أن الأيد تتجه نحوي أكثر، أركض بالداخل، أحاول الابتعاد، لا أستطيع فأحاول مرة أخرى ولكن لا محاله، أشعر به وهو يمسك بيّ لكي يجعلني أخرج من هذا المكان، لا أريد الخروج، علمت إنني أمكث في بطن والدتي، لا أعلم من أين علمت ذلك، كما أنني أيضاً علمتُ إنني عندما أخرج إلى مكاني الجديد سوف أراها، ولا يوجد أحد على الأرض سوف يحبني ويخاف على مثلها، الأيد تمسك بي وتخرجني أكثر، أشعر بالاستسلام، ولكنني أصرخ! لا أقبل هذا الوضع! مهلاً أنني حقاً جئتُ إلى مكاني الجديد، ما هذه

الأشياء أشعر وكأنني رأيتها منذ قبل لا، لا يمكن ذلك، هل ذاك الشريط الذي كان يمر أمامي هو حياتي الجديدة؟ أيعقل هذا؟ نعم هو، الذي يحدث الآن كان أول شيء أراه في الشريط، لا.. أعيديني من حيث جئت، أريد أن أعود داخل والدتي، أصرخ أكثر، صوت صريخي يملأ أركان الغرفة، أشعر بيد تضميني إليها، هل من الممكن أن تكون هذه أمي؟ يا أمي إن كنتي حقاً تحبينني وتخافي على من الهلاك أعيديني إلى داخلك، أعيديني إليك مرة أخرى فأنا لن أتحمل هذا..

قاطع أفكاري رنين الهاتف فتركت قلبي بجانبني وأجبت على نادر.

_ أنتِ فين؟ عايز أشوفك.

_ أنا قاعدة على البحر شوية تعالي..

_ هعدي عليكي..

_ هستناك..

بعد قليل جاءني نادر وجلس بجانبني.

_ بتعملي إيه؟

_ خضتني، كنت بكتب..

_ المعرض قرب وهنتشهرني وتنجحي وتنسيني بقي..

_ لا طبعا ده أنتَ السبب في كل ده.

_ أنتَ اللي موهوبة.

قال كلماته الأخيرة وهو ينظر إلى عيني مباشرة، فعانقت عيناه عيني فشعرت بالارتباك ثم نظرت إلى البحر فوراً ولم أجب عليه، عمّ الصمت قليلاً أما أعيننا كانت تتحدث.

كان قلبي يندفع مني ونبضاته كانت فاضحة، عروق يديه كانت بارزة بشكل يُعيرني كي أدفن يدي بين يديه، كان الطقس شديد فكننت أحتاج إلى عناقه لتشعر روحي بالدفء، كان كل شيء حولي يدعوني للالتصاق به.

كان الصمت معها له طعم آخر، كل شيء يبدو مختلف عندما تكوني معي، كان الهواء يلعب بخصلات شعرها ويتطاير بهم، فيجعلها تبدو في صورة أجمل مما هي عليها، كانت شاردة وتتأمل في البحر، قطعت صمتها فجاءة ونظرت إليّ.

_بتحب البحر؟

"لا.. ولكنني أحبك"

_طيب بتعرف تعوم؟

"لا أجد السباحة ولكن أجد حبك"

_أنت مش بترد عليا ليه؟

_حبيب أشوفك وأنت بتتكلمي شكلك بيبقى حلو وأنت سرحانة.

_نادر مش ناوي تقولي أنت بتعمل معايا كدة ليه؟

_هيفرق معاكي؟

_أكيد، وبعدين أنت وعدتني إنك في المرة الثالثة هتجاوب على سؤالي وأنا

أهو بسألك لثالث مرة جاوب بقى..

_مش عارف.

_نعم؟

_صدقيني مش عارف، بس أنا برتاح وأنا معاكي مش قصدي..

_أومال قصدك ايه؟

_قصدي أني بطمن بيكي.

_أنا مش فاهمة حاجة..

_فريدة أنا بحس إنني عملت حاجة كبيرة لما بخليكي كويسة، حاسس إنني مرتاح لما بقيتي أحسن، بفرح لما ألاقيني بتضحكي، وقلبي بيتقطع لما بيكون فيكي حاجة، صوتك بيطن قلبي، قريك بيخليني أحس بالدفا، ريحتك بتخليني أعرف أتنفس، لما بتكوني قريبة مني بحس أني عايش، أنا عايشك يا فريدة، كل مرة بشوفك بتعلق بيكي أكثر من المرة اللي قبلها، أنا عارفك قبل ما أنت تعرفيني، أول مرة شفتك فيها خطفتي قلبي وشغلتي تفكيرني، وبعديها أتقابلنا تاني، تفتكري القدر قرر إنه يجمعنا ببعض ليه؟
_نادر أنا..

_فريدة أنا بحبك، وأنت كمان بتحبيني، وعارفة أني بحبك كل حاجة كنت بعملها لك كانت بدافع الحب، مش عايزك تحبيني بس عايزك تفضلي جنبي، خدي وقتك ومساحتك وفكري ومش هضغط عليك...
"أمسكت يديها وضغطت عليها والدموع تكورت في عيني"

_فريدة خليكي، أوعديني إنك عمرك ما هتمشي، وأنا اوعدك إنني هبقالك وعمري ما هوجعك، حتى لو مبتحبينيش، أنا واثق إن حبي ليكي كافي إنه يخليكي تكلمي معايا، أنا من ساعت ما شوفتك وأنا مش شايف غيرك، أنا بحبك بكل ما تحمله الكلمة، بحبك بوجعك قبل فرحك بدموعك اللي كانت أول حاجة أشوفها فيكي قبل ضحكتك اللي علقطني بيكي أكثر، فريدة أنا روحي متعلقة بيكي وبوجودك، مش عايز منك رد، بس مش عايزك تمشي حتى لو مبقاش عندك رد..

أعذرني فإنني مليئة بالخيبات من بعض البشر بل من البشر جميعاً، فليس من السهل أن أثق بك وأثق إنك لن تعلقني بك ثم ترحل بعد كل الذي رأيته، بالرغم من إنني احتاجك وأعلم إنك لست مثلهم، ولكن أعذرني فأنا أحتاج لبعض من الطمأنينة من حين لآخر لتثبت لي إنك فريداً ولست مثلهم. فماذا لو وضعت قلبي بين يديك ثم تركته يسقط منك دون أن تدري؟
_ نادر أسمعني، منكرش أن في شعور من ناحيتك جوايا بس أنا خايفة عليك..

_ مفيش حاجة تخلييني أخاف وأنت موجودة.
_ أنا محتاجة أبعد.. مش عايزة أحس أنني أخذت خطوة أنا مش قدها مش عايزة أكون بظلمك معايا سيبيني أتأكد من حبك وأنت كمان خد وقتك علشان متكونش أتسرعت، عايزة أتأكد أنني بحبك مش أنني بحب نفسي وأنا معاك..
_ أزاي إيه الفرق؟

_ الفرق كبير يعني في فرق بين أنني علشان بحبك فحابة نفسي وأنا معاك وفرق بين أنني حابة نفسي وأنا معاك علشان كدة أنا معاك، أنا أسفة بس أنا مش هقدر أقولك أي حاجة غير لما أتأكد أن فعلا في حاجة..
_ براحتك.. أنا قلتك أنني مش هغصبك على حاجة بس أوعديني أن حتى لو مكانش في حاجة إنك هترجعي تاني، أنا قابل أننا نكون صحاب وبس صدقيني أي حاجة حلوة مادامت هتبقى منك فأنا عايزك تعرفي أنني مستعد أكون معاكي تحت أي مسمى بس المهم أنني أكون معاكي
_ أوعدك يا نادر..
_ هتوحشيني..

_حرفياً وأنت كمان، خلي بالك على نفسك..

_وأنتِ كمان..

انتظر الليل بظلامه وسكونه وهدوئه ونجومه وقمره، انتظره كي اختبئ
 بداخل وسادتي وأشارك دموعي وشهقاتي ما تبقي من ليليّ، أنتظره لأنه بالرغم
 مما فيه من هدوء إلا إنه يمكنه أن يتحمل ضجيجي والبُعثة التي بداخلي دون
 الافصاح عن الأمر، عكس الصباح تمامًا، فالصباح يُعريني، يجعلني أشعر
 إنني عارية ومكشوفة أمام الجميع، يظهر في جسدي علامات زرقاء يتساءل
 عنها الجميع، يحوط السواد حول عيني، يتحول وجهي إلى لون أصفر شاحب،
 فاضطر إلى خداعهم تحت مُسعى "لم يكن لدي وقت كافي للنوم، لذلك لم ينل
 جسدي قسط كافٍ من النوم، فيخدعوني هم أيضًا بأنهم يصدقونني، لذلك
 فأنا لا أحب النهار قط، فالليل هو حاجبي الذي يمنع العالم من رؤيتي أثناء
 انهياري.

(١٤)

_قاعدة لوحدك ليه؟

_تعالى أقعدى

_مش حابة تتكلى؟

كانت الدموع متحجرة في عيني، فنظرت لها وهزرت رأسي بمعنى لا، فابتسمت لي روان وضمتني بين يديها، وظلت تربط على يدي..

أتعلمي يا صديقتي، الأمور هنا سيئة للغاية، أجلسُ في نهاية كل يوم أنتظر أشياءً لم يعد لها وجود، أقنع نفسي دائماً بأنها هنا، وإنها لم تذهب، أحاول أن أرى بريق الأمل الذي يلمع في نهاية الطريق، ولكن كلما اقتربت منه كلما أبتعد عني، الصداع النصفي سوف يأكل رأسي، أم ربّما يحدث حالة انفجار للمخ من كثرة التفكير في اللاشيء، لا أعلم ولكني لست بخير، على الرغم من كل هذا الثبات الذي أبدو عليه..

_ليه اختارتي البعد بالرغم من إنك محتاجاه؟

_علشان أنا مفيش جوايا أي حاجة أقدمهاله في القرب، علشان أنا

خايفة يا روان

_ليه بتقارني يوسف ب نادر؟

_أنا مش بقارن صديقتي، وبعدين أنا نسيت يوسف بس منستش وجعي

وكسرتي، أنا بحب نادر وعلشان بحبه بعدت، أنا مش حمل أني أقرب وأتعلق

بيه أكثر وفي الآخر يمشي زي اللي مشيوا.

_بس هو وعدك يا فريدة..

_مش بالسهولة دي..

_يعني أنتِ عاجبك حالتك دي؟

_أوعدك أني أول ما أتأكد أني فعلاً بحبه هرجعله..

_مش فاهمة..

_يعني أنا خايفة أكون متعلقة بيه كل ده ومش بحبه، متدشيش أن نادر ظهر في أكثر وقت أنا كنت عطشانة فيه وكنت جافة، خايفة لما ارتوي كفاية، أحس أني مبجمهوش علشان كدة قررت أني أبعد لأن في البعد هقدر أحدد مشاعري وبعدين متخافيش أنا كويسة..

_أنا جنبك ومعاكى لحد ما توصلي لقرار...

_وأهو ده أكبر سبب يخليني أكون كويسة..

علمت من ذي قبل أن القلب يتألم أولاً، ولكني عقلي محطم فماذا عن

قلبي إذا؟

دمت بعيدة ودمت أنا منتظر رغم كبريائي ورغم كل شيء..

منذ قررت هي الرحيل وأنا حالي يتدهور كل يوم، الأمر لا يحتاج إلى تكاليف بل يحتاج إليها، أبحث عنك في كل مكان ولم أجدك إلا بداخلي، لما فضلت الغياب؟ ألم يرهقك البعد مثلما أرهقني؟ أليس وجودنا سوياً كان أفضل من كل هذا الوجع؟

ما أشبهك بديسمبر ولكنك باردة طوال العالم..

جسدي ساكن لا يتحرك وفي الجهة المقابلة تتشبث أفكارى وتقضي عليّ. يؤسفني قول هذا، ولكن حسناً سأعترف، إنني تحطمت، أصبحت كالزجاجة المبعثرة في كل ركن ولا تقوى على الالتئام والرجوع كما كانت،

أصبحتُ هشة، بإمكان عاصفة من الرياح أن تهزمني وتسقط بي أرضاً، وصلت إلى خسارة المباراة قبل بدايتها، يُمكنني قول أن الجحيم أصبح بداخلي وليس في الأخرة..

أعلم أنني من قررت الرحيل ليس أنت ولكني فعلت هذا أملاً في أن أصبح بخير، ولكن لا شيء سوف يكون على ما يرام من دونك، لا شيء سوف يتحسن في غيابك، يتحطم العالم في عيني عندما لا تكون في الصورة، أنني على يقين تام بأن كل التحسن يعود إليك، فروحي ترتوي بابتسامة منك، وتنبت عندما تكون بين أضلعي، أتكى عليك في العسر وتشبث بيدي حتى تصل بي إلى اليسر، العالم أصبح يتمثل فيك وبك لذلك لا تسحب روحي مني بغيابك حتى وإن كنت أنا صاحبة القرار فإنه حقاً يقتلني..

لن أمانع إذا جنّت ووضعت يدي بكفيك وهمست في أذني إنك ستبقى غصباً عني، لن أمانع إذا قلت لي من البداية "الأ"، لما لم تفكر في أنني كنت بحاجة إلى سماع منك كلمة تعارض تفكيري ومخاوفي؟ لم ذهبت بهذه السهولة دون أن تراجع معي قراري، أعلم إنك تريد أن تجعلني أفعل ما أريد، ولكن أليس لك علم بأنني كل ما أريده هو أنت؟

_الجميل ماله؟

_بكرة عيد ميلاد نادر

_ومالك مش مبسوطه ليه؟

_أبسطة ازاي واحنا مبنتكلمش أصلاً يا ماما؟

_طيب يابنتي ما هي دي فرصة إنك تكلميه وترجعوا تاني تتكلموا...

_أنت شايفة كدة؟

_أنا مش شايفة غير كدة صدقيني..

مهلاً عزيزي، يا مَنْ تملك قلبى، انتظر لحظة، أريدك في أمر هام، أنتظن
 إنني لم أتذكر أن أهنتك في تلك المناسبة؟ الأمر لم يكن كذلك، بل كيف
 تطلب مني أن أتمني لك أن تكون كُل عام بخير وأنا أردد ذلك كُل لحظة؟ كيف
 لك أن تُخطئ في حق نفسك وتطلب مني أن أدعوا لك بالسعادة بدلاً من أن
 أدعوا لك بالمكوث طيلة الوقت بين أضلعي، أليس هذا أسعد بالنسبة لك؟،
 أم لك رأي آخر؟، كيف لي أن أتمني لك شيئاً بدلاً من أن أتمني أن تكون أمامي
 دائماً كي أتمكن من إشباع رغبتى في النظر إليك، ألم تعلم أن عيناك هي
 منظاري؟، يا لك من أبله لا تفهم شيء، ألم تكن هذه جريمة في حق نفسي أن
 تمنيتُ لك عام أفضل بدلاً من أن أتمنى طيلة وجودي في حياتك، كيف لك أن
 تتحسن أعوامك في غيابي؟ يمكنني التوصل إلى أمرٍ سهل، ما رأيك أن نضمن
 الوقت الذي سوف يُهدر في التهنئة، وأن تهديني ذراعيك لكي أضممهم حول
 خصري وأدفن رأسي بين أضلعك، وأن استنشق هوائك؟ لعل هذا يرضي كُلاً
 منا؟

(١٥)

قررت اليوم أن أذهب إلى نادر في مكتبه، أرسلت رسالة إلى السكرتيرة الخاصة به كي أسألها عن مواعيده اليوم وأكدت عليها عدم إخباره بمجيئي إليه..

ارتديت فستانًا سماوي اللون ووضعت أحمر شفاه، وتركت شعري متحررًا وراء ظهري

اشتريت له قميصًا أبيض اللون ووضعت في جيبه ورقة مطوية بداخلها كلمات قد كتبها له حتى يتمكن من قراءتها عندما يرتديه..

ذهبت إلى العيادة في الوقت التي أخبرني عليه السكرتيرة، ترددت كثيرًا قبل دخولي كنت أشعر بالخجل والتوتر والاشتياق أيضًا، كنت اشتاق له ولرائحته ولبسمته والطريقة التي يتحدث بها، ونظرته عندما يكون غاضب، واحمرار وجهه عندما يشعر بالغيرة كنت اشتاق لجميع تفاصيله..

أبشر أنت أم نبض ينبض بداخلي؟

في النهاية دخلت إلى العيادة ووجدتها فارغة والسكرتيرة لم تكن موجودة، سمعت صوتًا بالداخل وباب المكتب لم يكن مغلقًا فدخلت إلى نادر في مكتبه وياليتني ما دخلتُ إليه، ياليتني تنازلت عن قراري هذا قبل أن أرى ما رأيته الآن، سقطت هديته في الأرض مع سقوط فرحتي ودموعي، نظرت له بعينٍ باكية ثم ذهبت على الفور..

أقف في وسط الطريق، أشاهد حبات المطر وهي تتساقط على وجهي، وتمتريج بها دموعي، لا أستطيع أن أميز كثرة الماء التي على وجهي أهي من أوجاعي أم من السماء؟ لا فرق فكلها تتساقط في الأرض، ولكن مهلاً فالناس أجمعين يكثرثون للمطر، هل يمكنك إخباري من يكثرث لدموعك؟ هل علمتُ الآن أن يوجد فرق بينهما؟

صرت في الشوارع ولا اعلم متى عدت إلى المنزل ولكني دخلت إلى غرفتي واغلقت الباب على حتى لا يدخل لي أحد ف أنا لم يعد لدي القدرة على فعل شيء، أصبحت انتظر قدوم الليل لأجلس في الظلام دون أي أضواء، لا أريد أن يشاركني أحد ليالي الحزين، كما أنني لن أسمح للموسيقي أن تحتل جزءاً من انتباهي فاغلقها على الفور، أخفض ضوء الهاتف لكي لا يزيد الإرهاق في عيني فأني أعتقد الدموع تكفيها لكي ترهقها، لو أنني أقدر أن أقل من معيار تلك الدموع التي تنزل دون أن تمل من النزول لكنت فعلت، ولكنها الشيء الوحيد التي لا تتوقف عن مشاركتي، فيما بعد أصبحت جثة هامدة، لا أقوى على فعل شيء سوى البكاء، ولكن ماذا بعد، نظرت إلى السماء من خلال النافذة ثم اجهشت بالبكاء، أخبرني يا الله أن ما رأيته كان غير صحيحاً، أخبرني يا الله إنه مازال ملكي ومازلت أحتل قلبه، أخبرني أن شعوري الآن ما هو إلا تخاريف ولم يحدث شيء، أخبرني يا الله فأنا لم يعد لدي طاقة لفهم شيء..

_ أنت فين؟

_ إيه يا نادر في إيه؟

_ بقولك أنت فين؟

_ أنا لسا في المستشفى..

_ طيب خليك عندك أنا هعدي عليك دلوقتي..
 "ذهبت إليه مسرعاً"
 _ إيه يا ابني في إيه؟ خضتني عليك..
 _ فريدة يا محمد..
 _ مالها فريدة؟
 _ هحكيلك، أنا كنت قاعد في العيادة بعد ما خلصت شغل..
 _ كدة في إيه مواعيد تاني النهاردة؟
 _ لا يا دكتور..
 _ طيب أنا هقوم امشي علشان تعبان، وانتِ كمان يالّا علشان تروحي..
 _ لأ مش هينفع تمشي..
 _ ليه؟
 _ أولاً كل سنة وحضرتك طيب، ثانياً عندك معاد خاص..
 _ مش بتقولي مفيش مواعيد تاني؟
 _ لأ ما هو الحقيقة إنها جايزة لحضرتك بخصوص عيد ميلادك..
 _ هي مين؟
 _ يستحسن تستني وتشوفها بنفسك..
 _ طيب خلاص تقدري تمشي أنتِ لو عايزة علشان الوقت أتأخر وأنا
 هفضل قاعد..
 "ذهبت السكرتيرة وجلست وحدي في انتظارها، كنت أأمل أن تكون
 فريدة، بعد قليل وجدتُ رائحة جذابة ويد تضع حول عيني وصوت أنثوي..
 وحشتني

_ياسمين!! هو أنتِ؟ إيه اللي جابك هنا؟
_أنا كنت معدية بالصدفة قدام العيادة قلت أطلع أشوفك وملقتش حد
برا فدخلتلك..

_عايزة إيه؟
_خرجت مني الكلمات بطريقة حادة، اقتربت مني ووقفت أمامي مباشرة ثم
قالت:

_النهاردة عيد ميلادك كل سنة وأنت طيب يا حبيبي..
_ياسمين أعتقد أن كل اللي بينا انتهى ف ملهاش لازمة طريقتك دي..
"وضعت يدها حول رقبتني واقتربت مني أكثر"
_وحشتني يا نادر، صدقني أنا ندمانة على كل اللي حصل..
"وضعت يدي على يدها كي أزيلها من عليّ، ولكني فوجئت بوجود فريدة
أمامي، شعرت بالصدمة كنت سأشرح لها ولكنها ذهبت قبل أن تسمعني، ف
صبيتُ غضبي كله على ياسمين

_أنتِ إيه يا شيخة مبتزهقيش؟ جاية عايزة إيه؟ دمرتني حياتي قبل كدة
ولما أتصلحت راجعة تدمريها من تاني؟ لأخر مرة بقولها لك يا ياسمين أبعدني
عني وعن حياتي كلها وأقسم بالله أنا لو خسرت فريدة بسببك مش هيحصلك
كويس سمعاني؟ واتفضلي أطلعي برا...

_وبس يا محمد ده كل اللي حصل اتصلت بيها مبتردش وبعديها تليفونها
أتقفل ومش عارف أوصلها...

_يعني أنت عايزها تشوف ياسمين في حضنك وترد عليك عادي كدة؟
_محمد مش وقت هزارك..

_ طيب خلاص، معاك رقم روان صحبتها اللي قلتلي عليها قبل كدة؟
 _ أيوا بس هتعمل بيه إيه؟
 _ هكلمها أشرحلها اللي حصل، وهي الوحيدة دلوقتي اللي هتقدر تتكلم مع فريدة وتفهمها..
 _ ما أنا لو معايا رقم روان مكنتش جيتلك..
 _ طيب والحل؟
 _ أنت بتسألني أنا؟
 _ بص مفيش حل غير إنك تحاول توصل لروان لأن هي الوحيدة اللي هتوصلك بفريدة..

أنتم لا تدرون كم من مجهودٍ يتطلب مني فعله كي أحادثكم، لا تدرون كم من معارك أخوضها يوميًا وحدي، لا تدرون كم من حطام يحدث لي، كم من انفجار يحدث في عقلي نتيجة لأفكاري المبعثرة، أنتم لا تعلمون ما الذي أفعله كي أظهر أمامكم بكل هذا الثبات الذي أبدو عليه، لم يكن عندكم علم بكم الهزائم التي تسقط بي أرضًا ثم ألملم شتات نفسي وأهض مرة أخرى، أنتم لا ترون الوجهة الشاحب الذي يكسوه ضحكة زائفة كي لا يشغل تفكيركم أمري، ولكنكم بعد أن علمتم بكل ما لم يكن لديكم علم به ما الذي سوف يحدث؟ هل سأشغل تفكيركم؟ هل ستصلون بي فالرابعة فجرًا كي تخبروني أنكم تحبونني وتبعثون لي بعض الطمأنينة؟ هل ستحاولوني من مخاوفي وتقفوا أمامي من الوحش الذي بداخلي وتحمونني؟ هل سترسمون وردًا يُزين السواد الذي يحوط عيني؟ هل ستبعثون لي حلًا لشيء؟ أم ستكتفون بهز رؤوسكم كي تؤكدون لي أنكم تفهموني وتنصتون إليّ، ما رأيكم أن نختصر كل

ذلك وأقول لكم أنني بخير بدلاً من أن أثبت عليكم كل هذا وفي النهاية ترددون لي أن كل شيء سيكون على ما يرام وأجعلكم تكذبون أمام الله وأمام أنفسكم كي تطمئنوني مع العلم أن لا يوجد شيء سيكون على ما يرام؟
توقفوا عن مُداوية أنفسكم بالكذب، فلا يوجد شيء يتحسن بل الأمر يزداد تدهورًا.

لا يوجد شيء يحدث سوى أنني أعود مبعثرة ألملم ما تبقى من روعي من كثرة الخذلان، لا يوجد تغير، لا أعلم ما الذي أريده ولا أعلم بماذا أشعر ولكني لست بخير..

لم أنم الليلة ظللتُ مستيقظة حتى صباح اليوم التالي، لم أجعل أُمي تشعر بشيء حتى لا تقلق عليّ تعاملت وكأن شيئاً لم يكن وأنا أمامها، كنت أتهرب من أن أنظر إلى وجهها فهي تفهمني من نظرة عيني..
كنتُ وحدي حولهم، أفكارِي كانت تصارعني وتلحق بي، في الوقت الذي كان يصدق فيه الجميع أنني بخير..

جاءتني روان ولاحظتُ شيء كانت ستسألني ولكني نظرت إليها ففهمت أنني أودها أن تصمت، دخلنا إلى غرفتي سقطتُ بين يديها فور إغلاق باب الغرفة، بكيتُ وكأنني لم أبك من قبل، ضمتني إليها وأنا أبكي وحاولت أن تهدئني دون أن تتسأل عن الأمر، كان يهملها أن أكون بخير ليس إلا، بعد أن هدئت قصصت عليها كل ما حدث ليلة أمس..

_مش معقول ده يحصل أكيد في حاجة غلط..

_بقولك كانت في حضنه وشفتهم بعنيا فين الغلط في كدة؟

_نادر مستحيل يعمل كده يا فريدة!!!

_مفيش حاجة اسمها مستحيل، شفتم بعيني يا روان كانت حضنها وهو
كان واقف.

_طيب أهدي صعب عليا أشوفك كده..

_مفيش أصعب من اللي شفته امبارح صدقيني..

_الو

_مين معايا؟

_أنا روان صاحبة فريدة..

_بجد؟ روان أنا عايزك ضروري..

_أنا كمان عايزاك..

_تمام نتقابل الساعة ٧ هبعثلك العنوان..

شعرت باسترداد روحي من جديد، كنت أأمل أن تساعدني روان في رجوعي
إلى فريدة مرة أخرى، فهي بمثابة كل شيء بالنسبة لي ولن أستطع العيش
بدونها..

ذهبت إلى المكان المتفق عليه ف وجدتها في انتظاري...

_أنا أسف على التأخير....

_ولا يهمك أنا اللي جيت بدري...

_فريدة عاملة إيه؟ طمني عليا تليفونها مقفول بقاله أسبوع ومش

عارف أوصولها.

_في الحقيقة هي مش بخير، فريدة حكنتلي اللي حصل يوم عيد ميلادك.

_صدقيني يا روان في سوء تفاهم والله ما في بيني وبينها أي حاجة خالص.

_مصداقك وعلشان كدة أنا كلمتك وجيتلك خصوصًا أن فريدة حالتها

بتسوء أكثر.

"قصصت عليها كل ما حدث من البداية حتى مجيء فريدة"
 _أنا هحاول أتكلم معاها وأفهمها اللي حصل، هي بتحبك علشان كدة
 موجودة بس أوعدك أني هحاول معاها على قد ما أقدر..
 _أنا مش عايز حاجة غير إنها تبقى كويسة وتصدق إنني مخنتهاش.
 _أنت بس سيبها الفترة دي شوية لحد ما تهدي وأنا هبقى أطمّنتك عليها..
 مر ثلاثة أشهر، كل شيء يمر ببطء، أخبرتني روان بما حدث معها هي
 ونادر، طلبت منها عدم فتح هذا الموضوع مرة أخرى..
 شيء بداخلي كان يقودني إليه والأخر يدفعني بعيداً عنه..
 قلبي يصدق ما قالته روان وعقلي لم يصدق سوى الصورة التي رأيتها
 ولكن الشيء الوحيد المتفق عليه هو أنني اشتقت إليه.
 ذهبت إلى البحر كي أجلس أمامه قليلاً، ولكنني وجدته هناك كان يقف
 حزيناً، شعره كان مبعثر، ملابسه كانت غير مرتبة عيناه كانت مطفاة، نزلت
 دموعي فور رؤيته، ارتجف قلبي عندما رأيته بهذا الحال، جمعت قوتي وذهبت
 قبل أن ارتعي بين يديه..

_فريدة

"صعق قلبي ووقفت جميع حواسي عندما سمعته ينادي علي"
 كنت أعتقد أن اسمي ليس مميز إلا عندما نطقته أنت..
 لم استدر له وظللت واقفة في مكاني، اقترب مني فشعرت بأنفاسه
 تخترقني..

بِأربط على قلبي طيلة الفترة الماضية وجئت أنت فككته بنظرة منك.

_استنى متمشيش

.... -

_أنا عارف إنك مش عايزة تشوفيني تاني، بس أنا عايزك تسمعيني، فريدة أنت كنت باجي هنا كل يوم طول التلات شهور اللي فاتوا على أمل إني أشوفك، أوقات كنت بلاقيكي، كنت بفضل واقف اتفرج عليك من بعيد بشوفك وأنتِ سرحانة وأنتِ بتضحكي وأنتِ دبلانة وأنتِ بتعيطي وأنتِ الهوا بييطير شعرك ويلعب بمشاعرك، فريدة أنا كنت معاكي طول الفترة اللي فاتت وعمري ما غيبت عنك، متمشيش يا فريدة خليكي أنا اللي همشي..

شعرت أنني أتنفس، ف منذ غيابه وكل الأشياء غائبة، لن أسمح لأحد أن يزيل آثار ندبات قلبي سوى حُبك..

مر أسبوعين على آخر مرة رأيته فيها، غدًا هو أول يوم من أيام المعرض وسوف تنزل روايتي فيه، أشعر بالخوف أريده بجانبني الآن..

_المفروض تكوني فرحانة..

_تفتكري هتنجح؟

_هتنجح بس؟ دي هتكسر الدنيا.

_أنا خايفة وبعدين نادر مش معايا فأنا مش عارفة أفرح.

_أكيد هيجي بكرة.

_بجد؟ هو كلمك؟

_لا بس أنا حاسة.

_طيب متتأخريش عليا بكرة.

كنت خائفة ف دعوت الله كثيرا أن يحقق لي حلمي، غفوت في مكاني حتى صباح اليوم التالي، وصلتُ أنا وأمي وروان إلى المعرض، كل شيء كان على ما

يرام عدا قلبي فكان منشغل بنادر.

هاتفنت روان وأخبرتها أنني سوف أحضر المعرض اليوم وأكدت عليها أن لا تخبر فريدة، كان اليوم هو آخر أمل لرجوعي أنا وفريدة، ارتديت القميص الذي أحضرته لي في عيد ميلادي فكانت المرة الأولى التي ارتديه فيها، نزلت من المنزل وكنت في طريقي إليهم وقبل أن أتحرك تحدثت مع روان وأخبرتني بما حدث منذ وصولهم.

كنت على وشك البكاء حتى سمعت صوته من خلفي يقول:

_مكنش ينفع تحضري نجاحك لوحدك.

_أنت إيه اللي جابك هنا؟

_نعم؟

"كنت سأقوم بالرد عليه ولكن قاطع حديثنا مجيئه"

_فريدة

"انتمينا جميعًا أنا ونادر وأمي وروان إلى مصدر الصوت"

_يوسف!!

_مبروك على النجاح لسازي ما أنت، عاملة ايه؟

_أنا كويسة، نسيت أعرفك دكتور نادر خطيبي..

_خطيبك؟

"رد عليه نادر قائلاً"

_وقريب هبقى جوزها بإذن الله في حاجة؟

_لاء مفيش حاجة أنا بس كنت عايزك في حاجة يا فريدة، بس الظاهر

إني جيتلك في وقت مش مناسب.

_هو الظاهر إنك نسيت يا يوسف أن أي حاجة بيني وبينك مش هتبقى مناسبة..

"نظر إليّ بغضب ثم رحل، تجاهلت نظرات نادر إليّ، كنت اشعر بالفرحة والنجاح، أريد أن أبكي من فرط السعادة، نظر لي نادر فجأة ثم قال:
_فريدة هو أنتِ كنتِ قاصدة الكلام الي قلتيه ولا كنتِ بتقوليه
وخلص؟

_كلام ايه؟

_أني خطيبك.

_نادر هو ده القميص الي أنا جيتهولك صح؟

_ايوا هووا...

_طيب حط إيدك في جيبك كدة واقراً الورقة الي فيه.

"قالت كلماتها الاخيرة وهي تبتمس ابتسامة صافية، أخرجت الورقة من جيبها وقمت بفتحها كي اقرأ ما فيها"

'خلقت منك، فما أنا إلا تكملة لك ولأضلعك، وما أنت إلا جزء مني ومن تكويني، وما نحن إلا وطن يكتمل بالآخر، فكنت لي شهيقي وكنت لك زفيرك'.

"تمت بحمد الله"